

ENGERI OKUSOMA EBYOB UWANGWA KU DDALA LYA

SEKENDULE GYE KUSOBOZESAAMU ABAYIZI

OKUKUUMA OBUTONDE BW'ENSI

SSEMANDA ARAPHA

REG NO: BAE /45451/143/DU

ALIPOOTA Y'OKUNOONYEREZA OLW'OKUTUUKIRIZA EBISAANYIZO BYA

DDIGULI Y'OBUSOMESA ESOKERWAKO EYA

SETTENDEKERO W'E KAMPALA INTERNATIONAL UNIVERSITY


OMULUDDAMYA:

MWAMI.MR.MATOVU CHARLES

MUZIGO 2017

OKUKAKASA OBUSOOSI

Nze Ssemanda Arapha nkakasa alipoota y'okunoonyereza eno mulimu oguvuvudde mu ntuyyo zange, nze ngwekoledde, era teriiyo muntu mulala yenna yali agukoze n'aguwaayo olw'okufuna ddiguli oba ebbaluwa endala yonna mu ssettendekero yenna.



SSEMANDA ARAPHA

28th/08/2017

Ennaku Z'omwezi

OKUKAKASA KW'OMULUGGAMYA

Kuno kwe kukakasa kwange nti ddala okunoonyereza kwa SSEMANDA ARAPHA ku mutwe:
“Engeri okusoma ebyobuwangwa ku ddaala lya sekendule gye kusobozesaamu abayizi okukuuma obutonde bw’ensi’ nze nkuluggamizza era kuwedde bulungi era alipoota etuuse okuweebwayo mu kitongole ky’eByennimi n’Empuliziganya mu ssettendekero wa Kampala International University



MR. MATOVU CHARLES

Omuluggamya



Ennaku Z’omwezi

OKUWONGA

Omulumu guno nguwonga eri taata Omw. George William Buzigi

ne maama omugenzi Nalukwago Kasalina Buzigi.

OKWEBAZA

Nneebaza bazadde bange mwenna, mikwano gyange mwenna, okwo ssaako abasomesa bange mwenna; ku mmwe kwe njigidde olulimi okuviira ddala mu buto bwange okutuuka ku Yunivaasite gye nnyongedde okulubangukamu ne nsobola n'okulukoleramu okunoonyereza kuno kwe nneenyumiririzaamu ennyo. Sirema kusiima mu ngeri ey'enjawulo taata wange omwami Badru Wangi kubanga otakabanye kulw'emisomo gyange naddala okuva mu S.1 okutuuka we mmaliddeko ddala ddigiri yange esooka, w'otali simanyi bwe nnandibadde, nsapa Mukama Katonda akuwenga nnyo omukisa.

Mukyala Nabiccu Sarah akulira ekiwayi ky'olulimi Oluganda mu kitongole ky'ebyennimi n'empuliziganya mu Ssettendekero wa KIU nkwebaza nnyo olw'okututendeka mu nsonga

z'olulimi ko n'olw'okutubuuliriranga. Omuluggamya wange mukyala Matovu Charles onnyarnbye nnyo ne nsobola okukola okunoonyereza okw'omutindo omulungi bwe guti, sirema kukwebaza olw'okurnbeera mu mutima ogw'okwagala era ogufaayo eri omutindo gw'emisomo gyange. Ka nkeere n'okwebaza buli aneeyambisa alipoota eno ku lw'okugasa omulembe

OKUNOONYEREA MU BUFUNZE

Okunoonyereza kuno kuli ku mutwe: "Engeri okusoma ebyobuwangwa ku ddaala lya sekendule gye kusobozesaamu abayizi okukuuma obutonde bw'ensi." Noolwekyo kwagenderera kuzuula ngeri ebyobuwangwa by'Abaganda ebisomesebwa mu sekendule gye bisobozesaamu abayizi okukuuma obutonde bw'ensi. Oluvannyuma lw'omunoonyereza okulaba obwetaavu bw'okunoonyereza ku mutwe guno yabaga ebigendererwa byagwo, n'aggyamu ebibuuzo, era nga bino bye byamulunnamya mu kunoonyereza kwe nga afuba okubifunira ebyokuddamu ebituufu era ebyesigika.

Omunoonyereza yasoma ebitabo ebiwerera ddala, n'ateekateeka bulungi ebbago ly'okunoonyereza kuno. Ebbago bwe lyamala okukkirizibwa era n'aweabwa n'ebbaluwa ennyanjuzi okuva mu kitongole ky'Eby'ennimi n'Empuliziganya mu settendekero wa KIU yatuukirira abantu ab'enjawulo abawerera ddala abaali babaddeko abayizi b'olulimi Oluganda ku ddaala lya sekendule okusobola okubafunamu eby'okuddamu ebyali byetaagisa okuzuula. Oluvanyuma, omunoonyereza yeekeneenya ebyaktnynaanyizibwa era nabiyungulula ko n'okubitaputa mu ngeri ey'ekikugu.

Okusenziira ku byava mu kunoonyereza kuno, kyakakasibwa nti omulanga gw'ensi yonna ogw'okudobonkana kw' embeera y'obudde, ko n'okufaafaagana kw'obutonde bw'ensi mu ngeri endala zonna, gusobola okwanukulwa obulungi okuyita mu nsomesa y'ebyobuwangwa ey'omulembe mu bantu ab'enjawulo mu masomero n'ebweru w'amasomero okusobola okubataba mu kaweefube w'okukuurna obutonde bw'ensi awatali kubakatuubiriza. Ebyazuulibwa biwerako era nga birambikiddwa bulungi mu alipoota eno. Bya mugaso nnyo ed abantu bonna abafaayo eri ensi, okwo ssaako abanoonyereza ku by'obutonde bw'ensi, ko n'abanoonyereza ku byobuwangwa okutwalira awamu.

ENDAGIRIRO Y'ALIPOOTA

OKUKAKASA OBUSOOSI	i
OKUKAKASA KW'OMULUNDAMYA	ii
OKUWONGA	iii
OKWEBAZA	iv
OKUNOONYEREA MU BUFUNZE	v
ENDAGIRIRO Y'ALIPOOTA	vi
ENDAGIRIRO Y'ENKANGAGA	ix
1.0 ESSUULA ESOOKA (Ennyanjula).....	1
1.1 OBUVO	1
1.2 OKWANJULA EKIZIBU	6
1.3 OMUGASO GW'OKUNOONYEREZA	6
1.4 EBIGENDERERWA BY'OKUNOONYEREZA	6
1.5 OBUKULU BW'OKUNOONYEREZA	6
1.6 OBUGAZI BW'OKUNOONYEREZA	8
2.0 ESSUULA EYOOKUBIRI (Okwekenneenya ebiwandiiko).....	9
2.1 ENNYANJULA	9
2.2 OBUKULU BW'OBUTONDE BW'ENSI MU KUYIMIRIZAAWO EBYOB UWANGWA ..	9
2.3 ENGERI OBUTONDE GYE BWEYOLEKERA MU MASOMO G'EBYOB UWANGWA ..	12
2.4 OMUGASO GW'EBYOB UWANGWA ERI OKUKUUMIBWA KW'OBUTONDE BW'ENSI	14

2.5 EBIBUZO BY'OKUNONYEREZA	19
3.0 ESSUULA EYOOKUSATU (Oluwenda lw'okunonyereza)	20
3.1 ENNYANJULA.	20
3.2 ENTEGEKA EYAGOBBERERWA.	20
3.3 EBIBINJA BY'ABANTU	21
3.4 ENNONTA Y'ABEETABA MU KUNONYEREZA	21
3.5 EKIFO KY'OKUNONYEREZA	21
3.6 EBYEYAMBISIBWA MU KUNONYEREZA	22
3.7 OBUTUUKIRIVU N'OBWESIGIKE BWEBINTU EBYAKOZESEBWA	22
3.8 OKWEKENNEENYA EBYAZUULIBWA	23
4.0 ESSUULA EYOOKUNA (Okwanjula, okuyungulula, n'okutaputa ebizuuliddwa)	24
4.1 ENNYANJULA	24
4.2 EBIBUZO BY'ENNYANJULA	24
4.3 EKIBUZO KY'OKUNONYEREZA EKISOOKA	30
4.4 EKIBUZO KY'OKUNONYEREZA EKYOKUBIRI	36
4.5 EKIBUZO KY'OKUNONYEREZA EKYOKUSATU	42
5.0 ESSUULA EYOOKUTAANU (Okukubaganya ebirowoozo, okuweera, n'okufundikira)	53
5.1 ENNYANJULA	53
5.2.0 Okukubaganya ebirowoozo	53

5.2.1 Obukulu bw'obutonde bw'ensi mu kuyimirizaawo ebyobuwangwa	54
5.2.2 Engeri obutonde gye bweyoleseza mu masomo g'ebyobuwangwa	56
5.2.3 Omugaso gw'ebyobuwangwa eri okukuumibwa kw'obutonde	57
5.3 OKUWEERERA ERI ABANTU AB'ENJA WULO	59
5.3.1 Gavumenti n'ebitongole bya nnakyewa	59
5.3.2 Abakulu b'ebyenjigiriza	61
5.3.3 Abasomesa	62
5.3.4 Omugigi omuto	64
5.3.5. Abantu fenna awamu	65
5.4 EBYETAAGA OKUNOONYEREZE BWAKO	66
5.5 OKUFUNDIKIRA	66
EBITABO EBIJULIDDWA	68
AKAWAAYIRO: EBIBUZO ERI ABAALIKO ABAYIZI	70

ENDAGIRIRO Y'ENKANGAGA

i Omwaka ayanukula ebibuuzo bino mwe yamaliririza eddaala lya sekendule	25
ii Obukozi n'obusomi bw'oyo ayanukula ebibuuzo	26
iii Ekika ky'omulimu ayanukula ebibuuzo gw'akola	27
iv. Omulimu omuyizi ayanukula ebibuuzo gw'asomerera	28
v. Eddaala omuntu ayanukula ebibuuzo bino kwe yakoma okusoma ebyobuwangwa	29
vi. Ebyobuwangwa ebisomesebwa mu sekendule nga okubissa mu nkola kwesigama ku butonde bw'ensi	34
vii Ebintu by'obutonde okuyamba abayizi okutegeera ebyobuwangwa ebyabasomesebwanga	39
viii Eby'obutonde ebiyamba n'ekyobuwangwa ebiyambibwa okutegeerekeka	40
ix Obwetaavu bw'okukuuma obutonde bw'ensi mu nsangi zino	44
x Ebyobuwangwa ebisomesebwa okukuuma obutonde bw'ensi	46
xi Engeri ebyobuwangwa ebisomesebwa gye biyambamu okukuuma obutonde bw'ensi	47
xii Okussa mu nkola ebyobuwangwa mu ngeri esobozesa okukuuma obutonde bw'ensi	49
xiii Ebintu ebyali bikoledwa abaaliko abayizi b'Oluganda nga bikuuma obutonde bw'ensi, n'engeri gye biyambamu okukuuma obutonde bw'ensi	50

ESSUULA ESOOKA

Ennyanjula

1.1 OBUVO

Ebibamba nnamuzisa omuli musisi, omuyaga, amataba, ekyeya, enjala, omuliro, endwadde, n'ebirala njolo by'owulira tebitandise jjo; byava dda (Byrant, 1991; Covello ne Mumpower, 1985). Smith ne Potley (2009) batulaga nti kaweeefube w'okubirwanyisa naye asussizza mu myaka 4000 e mabega. Wabula mu kusooka ebibamba bino abantu abamu baabitwalanga ng'ebiva eri Katonda nti era Katonda abikozesa okubonereza ensi olw'ebibi by'abantu. Nga noolwekyo tewali kintu muntu ky'ayinza kubikolera. Endowooza eno yawabgaala okutuusa mu kyasa ky'ekkumi-n'omwenda abakugu omuli Gilbert White (1936, 1945) lwe baakakasa nti ebibamba ebisinga obungi bisibuka mu nneeyisa z'abantu embi eri obutonde bw'ensi.

Obutonde bw'ensi obwogerwako wano buzingiramu ebintu byonna Lugaba bye yatugemulira ku senjendo ono Nnabulamu nga birina omugaso eri obulamu bw'abantu n'obw'ebintu ebirala ebiramu ku nsi. Obutonde bw'ensi buzingiramu ebitonde omuli ffe abantu, ebisolo, ebiwuka, ebyewalula, amazzi n'ebyamu byonna, awamu n'ettaka. Ettaka nno nalyo lifumbekeddemu eby'obugagga ebyobutonde njolo omuli zzaabu, ffeeza, amafuta, amayinja ag'omuwendo nga dayamondi, n'amalala; kyokka ate nga nalyo lyennyini likola enjazi, ensozi n'ebiwonvu omubeera entobazzi, emigga n'ennyanja; ate nate lye limerako emiti okwo ssaako ebimera ng'essubi n'omuddo (Kinlaw, 1993). Mu bwengula nayo eriyo obutonde gamba nga enjuba, omwezi, emmunyeenye, omukka gw'obulamu, ebinyonyi, n'ebirala. Waliwo n'obutonde obukosa ennyo obunnyogovu n'ebbugumu ly'oku nsi nga luno lwe lububi oluli mu bwengula olubisse ku nsi eno (Davies 1999).

Eby'embu, newankubadde nga empenda nnyingi zizze zigunjibwa ko n'okussibwa mu nkola okukendeeza akabi k'ebibamba ebyogeddwaako waggulu ko n'okubiziyiza, byo bikiyatigomya abantu ne gyebuli kati mu bitundu by'ensi eby'enjawulo. Smith ne Potley (2009) bannyonyola nti buli lwe wabaawo okukuubagana wakati w'abantu n'obutonde bw'ensi ebibamba nnamuzisa tebyewalika. Okunoonyereza kulaga nti abantu abaweza ebitundu kimu kya kuna (1/4) abafa mu nsi bafa ndwadde eziva ku kutyoboolwa kw'obutonde bw'ensi; era ebitundu bibiri bya kusatu (2/3) eby'abaana abatasussa myaka etaano abafa by'abo abafa endwadde ezeekuusa obutereevu ku kwonoonebwa kw'obutonde.

Kisoboka abantu okusigala nga bakola emirimu gyabwe naye bwo obutonde ne butattanyizibwa? Amakolero n'ebidduka ebinywa amafuta bivaamu amaloboozi ag'obulabe eri obutonde (Corbett, 1995), ssaako okuvaamu ebikka ebibi ebigenda mu nnyanja olwo ebyennyanja ne bifa, ate ebikka bino bwe bituuka mu ttale ensolo ne zirwala ko n'okufa (Biswas ne Geping, 1987). Okulundira mu kifo ekimu kumalawo omuddo gw'obutonde olwo n'ettaka ne likaddiwa mangu (Pickering ne Owen 1994). Ennima embu evaako ettaka okuggwaamu obugimu olwo emmere n'etebala (Briggs ne Courtney, 1989). Omuyaga nagwo gwanguyirwa okukunta n'amaanyi ne gwonoona emmere n'amayu g'abantu singa emiti n'ebibira tuba tubisaanyizzaawo. Ebyo bye bivaako ebbula ly'emmere mu nsi, kyokka nga obungi bw'abantu bwo bweyongera bweyongezi, ate kumisinde gya yiriyiri buli lukya. Bingi bye tukola ne bikiyankalanya embeera y'obudde ate nga kimu kya kubiri eky'ebibamba ebitubuutikira ne bitta abantu ko n'okwonoona ebintu biva ku mbeera ya budde embu (Wisner ne banne, 2004).

Kyazuulibwa nti ebitundutundu nga kinaana ku buli kikumi (80%) eby'ebintu ebivaako okuttattanyibwa kw'obutonde bw'ensi bisibuka ku mirimu n'enneyisa y'abantu ababeera ku senjendo ono Nnabulamu (Wisner ne banne, 2004), nti era wadde nga ebibamba ebimu tebiva

butereevu ku nneeyisa ya bantu, naye era enneeyisa y'abantu embi y'ebitegulula (Witheric, 1995). Nabwekityo kitukakatako ffe bakajjiiko-nattabula okumanya engeri y'okutandika okufaayo ennyo ku nsonga y'okukuuma obutonde bw'ensi.

Okukuuma obutonde bw'ensi kwe kutaliza ebintu by'obutonde ebitannatuuka kweyambisibwa ate ne biriisibwa ko n'okulabirirwa mu ngeri ebisobozesa okukula n'okutuuka obulungi ku ddaala kwe birigasiza ensi n'abagiriko. Ate eri eby'obutonde ebituuse okweyambisibwa, byo bikozezebwa mu kukekkereza okumala ne tukakasa nti bigasa ensi mu ngeri ey'amaanyi nga bwe kisoboka awatali kubidiibuuda wadde okubijaajaamy, era bwe kiba kisoboka bikuumibwe bireme kuggweerawo ddala wabula bibe nga birisobola n'okugasa ab'emirembe egiriddawo (Atta-Krah, et al 2010). Noolwekyo, okukuuma obutonde bw'ensi kaweeefube wa bantu kulongoosa nkozesa ze tukozeesamu ebintu eby'obutonde ebitwetooldde; okukakasa nti ebintu bye tukola ne bye tukozees te bikosa butonde bwa nsi; ate era n'okwetaba obutereevu mu kussa mu nkola enteekateeka eziyisiddwa nga zisobola okuddaabiriza, okutumbula kko n'okukuuma omutindo gw'obutonde bw'ensi.

Okuyita mu mikutu egy'enjawulo, okusomesa okw'amaanyi kuzze kukolebwa mu bitundu by'ensi ebyenjawulo, nga n'eggwanga lya Uganda mw'olitwalidde, okusobola okumanyisa ko n'okukyayisa abantu ebintu bye bakola nga bya bulabe eri obutonde bw'ensi; okwo ssaako okubasomesa era n'okubaagazisa enkola ze bateekeddwa okwettanira okusobola okutaakiriza obutonde bw'ensi. Zitumbulwe. Emisomo gino gitegekebwa ebitongole bya gavumenti eby'enjawulo naddala ebigwa mu minisitule ekwatibwako ensonga z'obutonde bw'ensi okwo ssaako ebitongole bya nnakyewa. Emikutu gy'empuliziganya nga empapula z'amawulire, laadiyo, telefayina, ssaako n'omutimbagano nagyo gyeyambisiddwa nnyo mu kubunya enjiri eno.

Ebyenjigiriza nabyo bifubye okuwoma omutwe mu kaweeefube ono ow'okutaakiriza n'okukuuma obutonde bw'ensi. Enkola nnyingi zigobererwa mu nasomero n'amatendekero ag'enjawulo nga

zitegekeddwa mu ngeri esobozesa okusiga mu bayizi obusobozi n'obwagazi obw'okukuuma obutonde bw'ensi. Mu mawanga mangi mu nsi bwe baba bategeka kaliculaamu w'ebyenjigiriza byabye, era nga babaga sirabaasi z'amasomo ag'enjawulo, ebisomesebwa ebikwata ku kukuuma obutonde bw'ensi biteekebwaamu. Amasomo nga Eryekikula ky'ensi, Eryebyobulamu bw'ebintu, n'amalala mangi gakwata butereevu ku butonde bw'ensi; era nga wano mu Uganda tugagattako eky'obugagga kyaffe eky'Ebyobuwangwa ku ddaala lya sekendule ne mu matendekero g'awaggulu eri abayizi abasoma ennimi ennansi naddala Oluganda, nga ebyobuwangwa by'Abaganda kye kimu ku biwayi ebikwata obutereevu ku butonde bw'ensi (Kirwana2007; Sarre ne Branden, 1996).

Kisaana kitegeerekeke bulungi nti bajjajjaffe ab'ebyasa ebiyiseeko emabega baatusinga nnyo mu kukuuma obutonde bw'ensi yaffe mu mirembe gyabwe, bw'oba obageraageranyizza naffe ab'omulembe guno. Engeri yokka gye tuyinza okusikira n'okusobola okweyambisa amagezi gaabwe naffe ne gatuganyula ye y'okugobereranga ebyobuwangwa nga nabo bennyini bwe baabigobereranga. Essomo ly'ebyobuwangwa eriri mu lulimi Oluganda lifumbekedde amagezi mangi agasobola okusobozesa bannansi b'omulembe guno okukuuma obutonde bw'ensi obubeetoolodde.

Ebyobuwangwa ebissiddwaako essira mu kunoonyereza kuno by'ebyo eby'Abaganda. Bizingiramu enzikiriza zaabwe, olulimi, empisa, ennono, obulombolombo, emirimu, emikolo, ennyambala, endya, ensula, enkolagana wakati w'abantu ne bannaabwe, n'obukwatane bw'omuntu ku munne (enḡanda); nga bwe bisiimibwa, bwe bikolebwa era bwe bizze bigobererwa Abaganda naddala wano mu Buganda okuviira ddala ku bajjajjaabwe ab'edda (Kirwana, 2007; Kimala, 1996). Okunoonyereza kuno kuloondodde ebyobuwangwa ebyo byokka ebisomesebwa mu masomero ga sekendule eri abayizi b'olulimi Oluganda.

Bajjajjaffe ebyobuwangwa baabikumanga nga bayita mu kubisomesa omujiji omuto kubanga bo baamanyanga obukulu bwabyo eri emirembe egiddirira. Baabisomesanga okuyita mu kuyigiriza

abaana emirimu egy'enjawulo era ne mu mikolo egy'ebyobuwangwa egyetabwangamu n'abaana abato; okwo ssaako okuyita mu masomo agaasomesebwanga ku kyoto agaasabikibwanga mu nnyimba, engero, enfumo, emboozi, ebikocco, ebikokko, ebitontome, emizannyo, n'ebintu ebirala. Eby'embu, olw'okukyukakyuka kw'emirembe ko n'enkulaakulana ezizze zibaawo mu Uganda (era ne mu nsi yonna), twesanga nga emikutu egyeyambisibwanga bajjajaffe okusomesa ebyobuwangwa byabwe eri emiti emito tegikyasobola kukola bulungi mulimo ogwo mu nsangi zino. Abaana tebakyafuna budde bumala nga bali ne bazadde baabwe awaka anti babeerera ddala ku masomero ebiseera byabwe ebisinga obungi.

Kino nno kye kinnyonnyola ensonga lwaki ebyayigirwanga eka edda kati biyingiziddwa mu masomo g'oku masomero olwo bireme kudibizibwa mu kiseera kino mwe bisinga okwetaagirwa okutusobozesa okukuuma obutonde bw'ensi. Abasomesa abatendeke be bakakkalabya eddimu lino ery'okutumbula ebyobuwangwa okuyita mu masomo ge basomesa, ng'emu ku mpenda z'okwagazisa n'okusobozesa abayizi okukuuma obutonde bw'ensi. Kino mu Uganda kyeyorekera nnyo mu byenjigiriza by'eddaala lya sekendule naddala eri abayizi b'olulimi Oluganda mu ssomo ly'ebyobuwangwa. Mu kiwayi kino ebyobuwangwa bingi bisomesebwa era nga bisobola okulaga abayizi obwetaavu bw'okukuuma obutonde, okubasobozesa okubukuuma, n'okubasigamu omutima omwagazi era ogulumirirwa obutonde bw'ensi, olwo ne baba nga bakikola bakiggya ku ntobo za mitima gyabwe --- si kutuukiriza luwalo.

Eyo ye nsonga lwaki okunoonyereza kuno kwakolebwa okusobola okuzuula engeri okusomesa ebyobuwangwa mu sekendule gye kuyamba abayizi okusobola okukuuma obutonde bw'ensi.

1.2 OKWANJULA EKIZIBU

Okusinziira ku kaweeefube agenda mumaaso mu ggwanga lyattu Uganda era ne mu mawanga amalala okwetooloola ensi, kya mugaso nnyo okukakasa nti ebisomesebwa abayizi mu masomero ku mitendera egy'enjawulo by'ebyo ebibasobozesa okufuuka bannansi abafaayo eri okuddaabirizibwa, okutumbulwa ko n'okukuumibwa kw'obutonde bw'ensi. N'olw'ensonga eyo okunoonyereza kuno kwakolebwa okusobola okuzuula engeri okusoma ebyobuwangwa mu sekendule gye kusobozesaamu abayizi okukuuma obutonde bw'ensi.

1.3 OMUGASO GW'OKUNOONYEREZA

Okunoonyereza kuno kwagenderera kuzuula engeri okusoma ebyobuwangwa mu sekendule gye kuwaamu abayizi b'olulimi Oluganda obusobozi bw'okukuuma obutonde bw'ensi.

1.4 EBIGENDERERWA BY'OKUNOONYEREZA

Okunoonyereza kuno kwagenderera okuzuula bino wammanga:

1. Okuzuula obukulu bw'obutonde bw'ensi mu kuyimirizaawo ebyobuwangwa.
2. Okuzuula engeri obutonde gye bweyoleseza mu masomo g'ebyobuwangwa.
3. Okuzuula omugaso gw'ebyobuwangwa eri okukuumibwa kw'obutonde bw'ensi.

1.5 OBUKULU BW'OKUNOONYEREZA

Okunoonyereza kuno kukulu ddala kubanga kumanyisa abasomesa b'ebyobuwangwa amaanyi g'ebyo bye basomesa abayizi mu kusalawo engeri gye beeyisaamu eri obutonde bw'ensi. Kwagenderera kuzuula engeri y'okutumbula ensomesa yaabwe bye basomesa, awamu

n'ebyeyambisibwa mu kusomesa mu kaweefube w'okulaba nti tebikoma ku kuyisa buyisa bayizi bigezo wabula n'okubasobozesa okufuna obukugu n'obwagazi bw'okukuuma obutonde bw'ensi nga bakyali ku masomero gaabwe era n'awalala wonna we balaga ka babe nga bamalirizza emisomo gyabwe.

Eri abakulu b'ebyenjigiriza naddala mu Uganda, ebyazuuliddwa mu kunoonyereza kuno bibanjuluriza bulungi obukulu bw'ebyo ebisomesebwa bye balonda okubeera mu sirabaasi y'essomo ly'olimi Oluganda era n'ez'amasomo amalala gonna ag'enjawulo. Okunoonyereza kuno kulaga abakulu bano obwetaavu bw'okufa ennyo ku masomo agakwata obutereevu ku butonde bw'ensi; nti era mu kutumbula omutindo gwa kalaculaamu obutonde bw'ensi bulina okussibwamu ekitiibwa eky'enjawulo ensangi zino. Okufaayo kwabwe tekulina kukoma mu kubaga zisirabaasi kwokka wabula ne mu kuweereza eri amasomero ebintu eby'okweyambisa ebituufu era ebimala, okusobozesa amasomo agakwata ku butonde bw'ensi okugenda obukwakku. Era okunoonyereza kuno kulaga oba ngawaliwo obwetaavu bw'okunnyikiza ensonga y'okukuuma obutonde bw'ensi okusobola okusigibwa mu mitima gy'abasomesa olwo nabo ne bagisiga mu bayizi baabwe.

Abayizi b'ebyobuwangwa nabo ba kuganyulwa nnyo mu byava mu kunoonyereza kuno kubanga bibalambululira bulungi obuvunaanyizibwa bwabwe mu nsi nga bibalaga nti ensi b'etunuulidde okulaba nga beenyigira butereevu mu nkola z'okukuuma obutonde bw'ensi nga beeyambisa amagezi, okumanya era n'endowooza ennungi ze bafunira mu masomo g'olulimi Oluganda ag'ebyobuwangwa. Alipoota eno ya kubasobozesa okufaayo okuzuulanga obukwatane wakati w'ebyobuwangwa (awamu n'ebintu ebirala) ebibasomesebwa mu ssomero n'ensonga y'obutonde bw'ensi.

Okunoonyereza kuno era kukulu eri gavumenti n'ebitongole bya nnakyewa ebyomu ggwanga lino era n'eby'ensi yonna mu ntegeka zaabwe ez'emisomo egikolebwa okusomesa era n'okwagazisa abantu ebikwata ku kukuuma obutonde bw'ensi. Okusenziira ku byazuulibwa mu kunoonyereza kuno,

ebyobuwanga by'abantu bisaale mu kunnyikiza kaweefube w'okukuuma obutonde bw'ensi era tebirina kubuusibwa maaso mu nteekateeka zino; era alipoota eno erambika bulungi ensonga eno n'engeri gy'eyinza okussibwa mu nkola okutumbula kaweefube w'okutaakiriza, okukutumbula n'okukuuma obutonde bw'ensi.

1.6 OBUGAZI BW'OKUNOONYEREZA

Okunoonyereza kuno kwakolerwa mu disitulikiti y'e Kampala mu bantu abaasoma ebyobuwangwa by'Abaganda mu lulimi Oluganda ku ddaala lya sekendule, abaamala emisomo gyabwe nga kati bakola awamu n'abo abakyali abayizi mu matendekero agaawaggulu.

Ekitundu kya disitulikiti y'e Kampala kyalondebwa olw'okuba nti kirimu abantu bangiko abaamala okusoma nga kati beekolera mirimu gyabwe naye nga baasomera ebyobuwangwa mu lulimi Oluganda mu sekendule mu masomero ag'enjawulo okuva mu bitundu by'eggwanga eby'enjawulo mu myaka egy'enjawulo, nga mu kiseera ky'okunoonyereza kuno baali beekolera mirimu gyabwe mu kibuga Kampala.

Ate mu ngeri endala, ekitundu kino kirimu amatendekero mangiko agasomesa olulimi Oluganda ku ddaala lya settendekero, nga kino kyayanguyiza omunoonyereza okusobola okutuukirira abantu abaaliko abayizi b'olulimi Oluganda abawerako abaasomera ebyobuwangwa mu sekendule mu masomero ag'enjawulo okwetooloola eggwanga era mu myaka egy'enjawulo.

Abantu abaaliko abayizi b'olulimi Oluganda ku ddaala lya sekendule baalondebwa lwa nsonga nti be basobola okulaga obulungi oba nga ebyobuwangwa ebyabasomesebwa ku ddaala lino birina engeri gye bibayambyemu mu kwetaba mu nkola z'okukuuma obutonde bw'ensi, okuviira ddala lwe baali bakyali ku masomero gaabwe okutuukira ddala we bali mu matendekero agaawaggulu oba mu buvunaanyizibwa obulala bwe balina.

ESSUULA EYOOKUBIRI

Okwekenneenya ebiwandiiko

2.0 ENNYANJULA.

Ekitundu kino kye kirambika ebintu ebiri mu biwandiiko ebyamala edda okufulumizibwa nga bikwata ku mutwe guno ogunoonyerezebwo. Ebiwandiiko ebisinze okwesigamibwako bya lulimi Lungereza okwo gattako n'ebya Oluganda ebitonotono, nga kino kivudde ku kuba nti ebiwandiiko ebiri mu Luganda nga bikwata ku mutwe guno bitono ddala.

Okwekenneenya ebiwandiiko kuno kwesigamiziddwa buterevu ku bigendererwa bino ebisatu eby'okunoonyereza kuno: Okuzuula obukulu bw'obutonde bw'ensi mu kuyimirizaawo ebyobuwangwa; Okuzuula engeri obutonde gye bweyolekera mu masomo g'ebyobuwangwa; n'eky'okuzuula omugaso gw'ebyobuwangwa eri okukuumibwa kw'obutonde bw'ensi.

2.1 OBUKULU BW'OBUTONDE BW'ENSI MU KUYIMIRIZAAWO EBYOBUWANGWA

Omugaso gw'obutonde bw'ensi eri emirimu gy'Abaganda. Emirimu gy'Abaganda gyonna gyesigama buterevu ku butonde bw'ensi. Emmere (omuli n'emmere enjanda) erimwa mu ttaka ate nga nayo tekolwa bantu, ya butonde (Pickering ne Owen, 1994). Mu mulimu gw'okuyigga, ensolo eziyiggibwa ssaako n'ettale oba ebibira mwe ziyiggibwa bya butonde ate nga nabyo biri ku ttaka era ery'obutonde. Ebyennyanya ebivubwa bya butonde so nga n'ennyanya oba amazzi gonna mwe bivubwa ga butonde. Emirimu gy'eby'emikono nga ebiruke omuli emikeeka, ebibbo n'ebirala byonna biggyibwa mu bintu bya butonde gamba nga ensansa n'enjulu. Abaweesi beeyambisa mayinja n'ababumbi ne beeyambisa ebbumba, era nga byonna bya butonde. Okukomaga kwesigamye buterevu ku ky'obutonde ky'omuti omutuba. Okulunda tekusoboka awatali kitonde kirundibwa

gamba nga embuzi, enkokko, embwa, enjuki, n'ebirala; ng'era nokuzimda ennnnyumba bwe kutasoboka awatali kweyambisa bya butonde gamba nga emmuli, essubi, ebyayi, ettaka, n'ebirala (Kirwana, 2007). Ndaga Omuganda akola, nkulage omuntu ayimiriddewo ku butonde bw'ensi.

Omugaso gw'obutonde bw'ensi eri enfuga y' Abaganda. Buganda eyawulwamu ebitundu eby'enjawulo ebyanguya emirimu gy'obufuzi gamba nga amasaza, amagombolola, emiluka, n'ebyalo. Oluusi ebyalo byayawulwangamu kusinziira ku butonde bw'ekitundu ekyo, okugeza nga ekyalo kisalira ku mugga eruuyi olumu ne ku luuyi olulala nga kikoma ku lusozi. Ne mu mbiri z'abafuzi ba Buganda, ebintu ebyeyambisibwayo bya butonde omuli emiti egisimbibwa mu mpya, amasanga ng'eribeera ku mulyango ewa Kabaka, embugo, amaliba, n'ebintu ebirala njolo (Kimala, 1996). Bino byonna biraga nga ddala obufuzi bwa Buganda obw'ennono bwesigama nnyo ku butonde bw'ensi.

Omugaso gw'obutonde bw'ensi eri emizannyo gy'Abaganda. Buli muzannyo gw'Abaganda guyimirirawo lwa butonde bw'ensi. Googolo akolerwa ku biteteme ku kiswa; sekitulege akolerwa ku buti; okubaka amayinja oba ensigo za kabakanjagala; okukanyuga envuumuulo (gukolebwa byayi na mayinja); enkuyo, eno ebajjibwa mu muti; okubonga enje, zino nsigo za mpafu; olusuubo, luno lukolebwa ddiba lya nsolo n'emiguwa; kantuntunu, kwesiba byayi mu maaso; embirigo, eno ekolebwa mu muti; okuzannyisa entengotengo; omuzannyo gwa semufu, omu yeesiba essanja; okuwuga mu mazzi; n'emizannyo emirala njolo, naye nga egisinga tegiyinza kuyimirirawo awatali butonde bwa nsi (Kimala, 1996). Buli anyumirwa emizannyo egyo alina okukimanya nti aba anyumirwa butonde bwa nsi Lugaba bwe yatugemulira.

Omugaso gw'obutonde bw'ensi eri ensinza y' Abaganda. Okusookera ddala, ebintu by'obutonde bye tulaba bye bituwaliriza okusinza Katonda. Ate bwe tutandika okumusinza, era tweyambisa bintu bye yatonda omuli ebisolo n'ebinyonyi ngamba ng'enkokko bye tumuwongera nga tubisala oba nga

tubimwokera nga saddaaka. Ekiggwa oba essabo mwe tumusinziza lizimbisibwa bintu bya butonde omuli emiti, essubi, ebyayi, obudongo n'ebirala (Pickering ne Owen, 1994). Ebintu ebikozesebwa nga tusinza byonna biva mu butonde omuli enqoma, embugo, ensaasi, amaliba g'ebisolo, emmwanyi, ensimbi enqanda, n'ebilala njolo (Kimala, 1996). Awatali butonde twanditandise tutya okusinza Lugaba? Obutonde era bwe buzimbirwako emizizo n'okuwanuuzwa kw'Abaganda okwetooloolera ku nsolo, ebinyonyi, ebiwuka, n'ebintu ebirala .

Omugaso gw'obutonde bw'ensi eri empisa y'obufumbo ko enkuza n'endabirira y'abaana mu Buganda. Emikolo egisinga egigendera ku bufumbo bw'Abaganda gyesigama ku butonde omuli: okwanjula, anti ebireetebwa ku kwanjula biba bya butonde gamba nga enwa endiirwa, enswa (omutwalo), n'ebirala (Kimala 1996). Emikolo egigendera ku kuzaala n'okukuza abaana egisinga gyesigama butereevu ku butonde gamba nga amazzi, amata, obutiko, ebibbo n'eby'obutonde ebirala bwe byeyambisibwa mu kwalula abaana. Ekyogero ekyeyambisibwa abazadde ku baana baabwe nakyo kikolebwa mu mirandira, ebikoola ko n'ebikuta by'emiti egy'enjawulo (Kirwana, 2007); ate era ebintu ebyo bye bimu bisaale mu kujjanjaba endwadde ez'enjawulo (ne mu bantu abakulu) wano mu Buganda (Pickering ne Owen, 1994).

Omugaso gw'obutonde bw'ensi eri okukolagana n'enqanda wakati w'Abaganda. Empisa y'obuko n'enqanda ekuumibwa mu kweyambisa ebintu nga enkoko (eweewwa omuko), okwanirizanga abagenyi n'obawaayo ku mmwanyi oba enswa (eby'obutonde), akasiimo k'abajjwa kaba ka mitwe gya nsolo eziba zaabaagiddwa mu mukolo gamba nga ogw'okwabya olumbe, empisa y'obwasseruganda yeeyoleseza mu kuwa ku miriraano ku bintu nga obutiko, enswa, omuyiggo, n'ebirala kyokka nga kyenkana byonna bya butonde. Mu kutta omukago mmwanyi ze zeeyambisibwa, era ne mu mbeera endala nnyingi (Kirwana, 2007). N'olw'ekyo, ebintu by'ebutonde ebitwetoolodde bye bitusobozesa okukuuma obuko, enqanda n'emikwano ng'Abaganda.

Omugaso gw'obutonde bw'ensi eri empisa y'okufa mu Buganda. Emikolo gyonna egigendera ku kufa gyesigama butereevu ku butonde bw'ensi: ebyeyambisibwa okuviira ddala ku mazzi agayinza okweyambisibwa okulongoosa omufu okutuukira ddala ku kumuziika. Mu kugema omufu aleme kuwunya ebinyirikisi bye byeyambisibwa (era nabyo bya butonde). Mu kugema omufu aleme kululuma, omujjwa addira empindi ensajja (ya butonde) n'agisuula mu ntaana. Omufu aziikibwa mu ttaka (lya butonde) ate oluvannyuma lw'okuziika ebigogo by'ebitooke (era eby'obutonde) ne byeyambisibwa okunaaba mu ngalo. Omuntu eyeetuze aziikibwa mu kisaalu oba mu kibira era bino byonna bya butonde. Mu mikolo gy'okwabya olumbe, ebintu by'obutonde mu kweyanbisibwa bikwata kisooka omuli, amasanja, embugo, emmere, n'ebirala ntoko (Kirwana, 2007). Okufa kintu kibi nnyo naye ate awatali kweyambisa butonde, okufa gufuuka mutawaana nnyo nnyini ddala.

2.2 ENGERI OBUTONDE GYE BWEYOLESEZA MU MASOMO G'EBYOBUWANGWA.

Ebisomesebwa byennyini. Mu masomo g'ebyobuwangwa ebisomesebwa ebikulu biba byabuwangwa naye nga toyinza kubyawukanya ku butonde bw'ensi (Kirwana, 2007; Kimala, 1996). Mu byo musangibwamu ebiwayi ngabyo bikwata butereevu ku butonde bw'ensi naye nga byabuwangwa olw'engeri gye bissibwamu ekitiibwa ko n'okweyambisibwa Abaganda. Okugeza: Omuganda n'ensiko, Omuganda n'ekitooke, n'ebirala. Ate era na buli kimu ku byobuwangwaebirala byonna kirina akakwate kubintu eby'obutonde: okugeza, emirimu ng'ogw'okulima gukolebwa ku ttaka (ery'obutonde), ensolo eziyiggibwa za butonde, n'emikolo mingi giyimirirawo ku bintu bya butonde, okugeza ogw'okwalula abaana ogweyambisibwako ebitonde nga obutiko, amata oba amazzi, ebitooke okufugikibwa obulira, n'ebintu ebirala bingi.

Ebyeyambisibwa mu kusomesa. Omusomesa w'ebyobuwangwa talema kuddira bintu by'asomesaako oba ebibifaanana, oba ebifaananyi byabyo, n'abyeyambisa mu kusomesa okusobola okwanguyiza abayizi okutegeera obulungi ekyo ky'aba asomesaako (kirwan 2007). Okugeza, bw'aba asomesa ku kyobuwangwa ky'okukomaga, talema kweyambisa bintu nga ekitentegere, ensaamu, oba n'okulaga abayizi omuti gw'omutuba bwe gubaawo awo ku ssomero, oba okubalaga ebifaananyi byabyo oba ebimu ku byo. Ebintu ebyobyonna bya butonde oba waakiri biva mu bintu eby'obutonde olwo ne byeyambisibwa Abaganda ng'ebyobuwangwa.

Ebintu ebyetoolodde ekibiina awasomerwa. embeera okwetooloola omuyizi ekola kinene nnyo ku kusoma kwe mu masomo gonna nga n'ery'ebyobuwangwa teritalizibbwa. N'olw'ekyo, ebintu eby'obutonde ebibaawo tebirema kukwataganyizibwa n'ebisomesebwa mu bwongo bw'omuyizinga asoma. Okugeza, ku ssomero watera n'oluusi nga wateekwa okubaawo emiti, ebimuli, amazzi, ebisubi, ettaka, n'ebintu ebirala. Ng'omuyizi, bw'aba asoma ku bintu nga omulimu gw'okulunda, talema kugukwataganya n'ebisubi by'alaba ebweru w'ekibiina, anti ye mmere y'embuzi ezirundibwa Abaganda (Kimala 1996).

Eby'okulabirako ebireetebwa mu kusoma. Omusomesa bw'aba asomesa abaako eby'okulabirako by'anokolayo okusobola okuttaanya ensonga eyo gy'abaannyonnyola, ate mu ngeri y'emu ayinza n'okuwa abayizi omukisa gw'okuleetayo eby'okulabirako bo bye balaba bituukira obulungi kw'ekyo eky'obuwangwa ekiba kisomebwako. Wano tewalema kweyolesezaawo kintu kya butonde nga kirina engeri gye kikwataganyizibbwa n'ekyobuwangwa mu bugendererevu oba mu butanwa. Okugeza, mu kusoma eky'obuwangwa ky'emmere enqanda, mu buli ngeri ebika by'emmere ey'omu ttaka ebireetebwa biba bya butonde omuli lumonde, endaggu, muwogo, n'ebirala (Kimala 1996).

Omusomesa okweyambisa enkola y'okutobeka ebisomesebwa eby'amasomo amalala.

Omusomesa w'ebuyobuwangwa ayinza okuyingizaamu ebisomesebwa mu masomo amalala (nga birimu ebikwata ku butonde bw'ensi mu butakigenderera) okusobola okukkaatiriza ensonga gy'aba aliko. Okugeza, ayinza okuba nga asomesa ku kyobuwangwa ky'okuvuba n'atobekamu eby'essomo lya "Geography" nga alaga ebika by'amazzi agavubibwamu ebyennyanja omuli emigga n'ennyanja n'ebidiba. Mu kwogera ku migga n'ennyanja n'ebidiba, aba ali mu kwogera ku butonde obuwedde emirimu (Kirwana 2007).

2.3 OMUGASO GW'EBYOBUWANGWA ERI OKUKUUMIBWA KW'OBUTONDE BW'ENSI

Waliwo endowooza egamba nti obuwangwa bw'abantu butera okukontana n'obutonde bw'ensi. Oludda olumu ntuufu so nga oludda olulala si ntuufu. Obuwangwa okukosa obutonde kiva ku kubusobya oba okubutuukiriza mu ngeri enkyamu naye nga bwo ku bwabwo bwazimbibwa mu ngeri essaamu obutonde bw'ensi ekitiibwa. Okufaafaagana kw'obutondeokuvaako n'ebibamba ebinene kutera kuva ku kuba nti abantu tebakyagoberera bulungi byabuwangwa byabwe (Witheric, 1995; Sarre ne Blunden, 1996). Nga Franklin ne banne (2000) bwe bannyonnyola, ebyobuwangwa ate bisaale nnyo mu kuddaabiriza n'okukuuma obutonde bw'ensi era nga bikoze kinene nnyo mu kutaakiriza embeera y'obutonde bw'ensi ezze edobonkanyizibwa ennyo mu lwasa luno olwokubiri. Ensonga zino wammanga ezeesigamiziddwa ku byobuwangwa by'Abaganda ze zikakasa obutuufu bw'okunnyonnyola okwo.

Engeri emirimu gy'Abaganda gye giyambamu mu kukuuma obutonde bw'ensi. Emirimu gy'Abaganda egisinga tegikoma ku kwesigama ku butonde bw'ensi wabula era giyamba mu

kubukuuma mu ngeri ez'enjawulo. Okugeza, mu kulima, waliwo ebirime omuli ebijanjaalo n'ebirala ebitumbula obugimu bw'ettaka obuba bulikendeddemu; Abaganda tebassaamu bigimusa bya mu makolero ebitera okuba eby'obulabe (Briggs ne Courtney, 1989). Okusimba ebirime mu kulima nakwo kuyamba mu kukuuma embeera y'obudde nga nnungi (Pickering ne Owen, 1994). Okuyigga kw'Abaganda tekweyambisanga mmundu wadde ebidduka nga emmotoka kubanga ebyo byo byonoono obutonde bw'ensi (Heineman, 1984); Abaganda beeyambisa mafumu na ntuula ebitakosa butonde. Mu mulimu gw'okukomaga, obutonde bussibwamu nnyo ekitiibwa, anti omutuba gulindibwa ne gumala kukula bulungi ne gulyoka guggyibwako ekitentegere, ate oluvannyuma lw'okukiggyako gubembe'wa bulungi okubuna olwo ne gutakala wabula ne gweyongera okukula; kino kiyamba okulekawo emiti egikwata ettaka ne litakulugguka (Pickering ne Owen, 1994).

Engeri eby'enfuga y'Abaganda gye biyambamu mu kukuuma obutonde bw'ensi. Buganda efugibwa abafuzi ba ngeri bbiri: ab'ensikirano, okugeza Kabaka n'abakulu b'ebika; n'abalondebwa obulondebwa, okugeza abaami b'amasaza, amagombolola, emiluka n'ebyalo. Obufuzi bwombiriri bufaayo nnyo ku kukuumibwa kw'obutonde bw'ensi. Okugeza, ogumu ku mirimu gy'abaami abo emikulu gwe gw'okukunganga abantu mu kwetaba mu mirimu egy'enjawulo nga n'egisinga ku gyo gitumbula butereevu obutonde bw'ensi. Okugeza abaami b'emiruka baalinanga obuvunaanyizibwa bw'okulimisa abantu emisiri gy'emmere era n'abakozesa n'ebyagi mwe bagitereka; baasimisanga abantu zibuyonjo n'okuzizimbako ebisaakaate; baasimisanga ko n'okugogoza enzizi mu byalo (Kimala, 1996). Emirimu egyo gyonna egyakulemberwangamu abafuzi nga giyamba nnyo mu kukuuma obutonde bw'ensi (Witheric, 1995). Omwami ow'ekyalo naye yabanga musaale mu kukulemberamu ogwa bulungibwansi. Nga oggyeeko ebyo, olw'okuba nti ebintu bingi ebyeyambisibwa mu mbiri z'abaami n'olwa Kabaka omuli enjoma, embugo, amafumu, amaliba, n'ebintu ebirala biva mu bintu bya butonde, kireetera Abaganda okukuuma obutonde obwo

kibasobozese okuggyangamu ebintu ebyo eby'ennono n'obulombolombo bw'obufuzi mu Buganda kubanga byetaaga okutuukirizibwa.

Engeri emizannyo gy'Abaganda gye giyambamu mu kukuuma obutonde bw'ensi. Nga bwe kimanyiddwa nti emizannyo gy'Abaganda gyonna giyimiriddewo lwa butonde bw'ensi, Abaganda baafubanga nnyo okulaba nti ebintu ebyeyambisibwa mu gyo n'engeri gye gizannyibwamu tebyonoona butonde bwa nsi, kubanga bwe budobonkanyizibwa giba tegikyasoboka oba nga tegikyanyuma ng'edda (Kimala, 1996). Okugeza, googolo akolerwa ku biteteme nga biggyiddwa ku mugogo gw'ettooke eryakuze ne riggyibwako emmere so si kutemula nsukusa. N'ebintu ebyabanga biwedde okuzannyisibwa byayinzanga okuddamu okussibwa mu kifo we bigasiriza obutonde. Okugeza, ebyayi oba essanja ebyabanga bizannyisiddwa mu mizannyo nga kantuntunu, envuumuulo, semufu n'emilala nga bibikkibwa mu lusuku ne birugimusa. Nga oggyeeko ebyo, olw'okuba nti ebintu bingi ebyeyambisibwa mu mizannyo egy'enjawulo nga amazzi g'okuwuga; ebiswa by'okukolerako googolo; emiti omuggyibwa enkuyo, embirigo, n'ebirala biba bya butonde, Abaganda kyabakakatangako okukuuma obutonde obwo kibasobozese okuggyangamu ebintu ebyo kubanga byetaagibwa; olwo bwo obutonde ne bukuumibwa (Witheric, 1995).

Engeri ensinza n'enzikiriza z'Abaganda gye biyambamu mu kukuuma obutonde bw'ensi. Okusookera ddala, ebintu by'obutonde bye tulaba bye bitusobozesa okusinza Katonda (Kirwana, 2007). Abaganda olw'okutya Katonsda, buli kintu naddala ebirina obulamu bakissaamu ekitiibwa nga ekitonde kya Katonda. Baakyawangako ebyo byokka eby'obulabe gye bali, era kino kwe kwava n'enjogera ewolereza omunya nti aligutta taligenda mu ggulu kubanga tegulina musango. Bwe kituuka ku kusinza kwennyini, Abaganda baayokyanga ebisolo nga embuzi n'enkoko olwo akaloosa akaabivangamu nga ke kasanyusa Katonda (Kimala, 1996). Nga oggyeeko ekyyo, olw'okuba ebintu ebizimbisibwa amasabo n'ebiggwa biva mu butonde bwa nsi okugeza emiti, essubi n'ettaka; okwo

ssaako ebyeyambisibwa mu kusamira nga ebita, ebibya, emmwanyi, amaliba, enjoma, embugo, n'ebilala, Abaganda baafubanga okutangira okwonooneka kw'obutonde mwe biva, okugeza nga batangira okwokyebya kw'ettale n'ebibira, okwo ssaako n'okusimbanga ebiryo omuva ebita. Mu ngeri eyo, obutonde nga bukuumbwa, kubanga okusinziira ku Heineman (1984), okusimba emiti n'ebiryo kuyamba nnyo mu kukuuma embeera y'obudde n'okutangira ettaka okukuluggusibwa mukoka oba embuyaga.

Engeri empisa y'obufumbo ko enkuza n'endabirira y'abaana mu Buganda gye biyambamu mu kukuuma obutonde bw'ensi. Awatali butonde bwa nsi, empisa y'obufumbo teyinza kutuukirira anti mubutongoleobufumbo butandika nga enva endiirwa n'omutwalo (ogwabanga ogw'enswa) bimaze kusasulwa mu bazadde b'omuwala. Kino nno kyategeezanga obukulu bw'ebiswa n'enswa, era nga bissibwamu ekitiibwa ko n'okukuumibwa. Omuntu ne bwe yabanga alima n'atuuka awali ekiswa nga alina kukitaliza n'atakiggyaawo wabula okukilongoosa olw'enswa ezibuukamu (kirwana, 2007). Ne mu nsonga z'okuzaala n'okulabirira abaana mu Buganda nga ebintu by'obutonde byesigamwako nnyo era nga n'olw'ekyo bikuumibwa butiribiri. Okugeza, ekitanyi kifugikibwa mu kitooke. Kale nga Omuganda omuzadde tolina bw'omuggya ku kulima n'okulabirira ebitooke. Abaganda tebaalemanga na kusimbabimera ko n'emiti ebyeyambisibwa mu kukola ekyogero era n'eddagala ly'abakulu erivumula obulwadde obw'enjawulo. Baayinzanga okusimba emiluluuza, olweza n'ebirala mu nnimiro, mu lusuku oba mu luggya nga bya kwejjanjabisanga n'okulabirira obulamu. Kino kitumbula buterevu obutonde bw'ensi. Ate ekintu ekilala ekikulu, Abaganda bwe baabanga bejjanjabatebaatemanga miti kuggyako ddagala wabula nga omuti bagukoccolako ekitundu ekyo kyennyini ekiba kiriko eddagala gamba nga emirandira egimu, ebikoola ebimu oba ebikuta ebimu, olwo gwo omuti ne gukuumbwa nga mulamu (Kimala, 1996).

Engeri empisa y'okukolagana wakati w'Abaganda n'enjanda gy'eyambamu mu kukuuma obutonde bw'ensi. Empisa y'okukwatagana kw'abaganda mu mirukwa egy'enjawulo kukulu nnyo mu kukuuma obutonde bw'ensi. Okugeza, empisa y'okukyaza omuko n'omugabula enkoko yawalirizanga nnyo Abaganda okulunda n'okulabiriranga enkoko ekiseera ky'onna. Ekirala, empisa y'okutta omukago ewa owoomukago wo obuvunaanyizibwa bw'okulabirira ebintu byo k'obe mulamu oba nga ofudde ate nga ebimu kw'ebyo ebirabirirwa biba bya butonde gamba nga olusuku lwo, ettaka lyo, ekibira kyo, ebisibo, oba ekintu ekirala kyonna eky'omugaso eri obutonde bw'ensi nekitafaafaaganalwakufa kwannyini kyo (Kimala, 1996). N'eky'okuba nti mu mukolo gwennyini ogw'okutta omukago kweyambisibwako emmwanyi, kyakubirizanga Abaganda mu okuzirima n'okuzirabirira okusobola okuzeeyambisanga mu nsonga ng'ezo. Empisa y'okugabula abageyi nayo etumbula enkola y'okulimanga emmwanyi so nga n'ebiswa nabyo byatalizibwanga anti kwe kuva enswa n'obutiko ebigabulwa abagenyi. N'enkola ya muganda wo okusikira ebintu byo nga obadde ofudde eyamba kinene mu kukuuma eby'obugagga byo (ate nga ebimu ku byo biba bya butonde) ne bitafaafaagana.

Engeri empisa y'okufa mu Buganda gy'eyambamu mu kukuuma obutonde bw'ensi. Emikolo gyonna egigendera ku kufa girina engeri gye gissaamu ekitiibwa ko n'okukuuma obutonde bw'ensi. Okugeza, Abaganda beesibanga ebimyu nga babijjamu byayi, anti ekyayi kiba tekikyalina mugaso ku kitooke, nga n'okukisalako kuba nga kusalira/kulongoosa kitooke ekyo (Kirwana, 2007). Mu kugema omufu aleme kuwunya ebinyirikisi bye byeyambisibwanga era nga nabyo biggibwa mu biteteme eby'ebitooke ebyatemwa edda (Kimala, 1996). N'omufu okuba nti aziikibwa mu ttaka kiggyawo ekivundu ku nsi ate lyo ettaka terirema kugimuka. Ne mu kwabya olumbe, ebintu ng'amasanja bwe bimala okweyambisiwa bibikkibwa mu lusuku olwo ne bifuuka ebigimusa

(Kirwana, 2007). N'ekintu ekilala kyonna ekifudde Omuganda tamala gakimansa buli w'asanze, akiteeka we kigasiza eri obutonde bw'ensi, okugeza, nga akiziikamu ttaka.

2.4 EBIBUZO BY'OKUNOONYEREZA

Okunoonyereza kuno kwagenderera kuzuula eby'okuddamu ebyesigika eri ebibuuzo bino ebisatu ebyaggyibwa mu bigendererwa by'okunoonyereza kuno.

1. Obutonde bw'ensi bulina bukulu ki mu kuyimirizaawo ebyobuwangwa?
2. Ebintu by'obutonde byeyolekera bitya mu masomo g'ebyobuwangwa ku ddaala lya sekendule?
3. Ebyobuwangwa birina mugaso ki eri okukuumibwa kw'obutonde bw'ensi?

ESSUULA EYOOKUSATU

Oluwenda lw'okunoonyereza

3.0 ENNYANJULA.

Ekitundu kino kitaggulula oluwenda olwayitibwamu okusobola okutambuza n'okukumaliriza obulungi omulimu gw'okunoonyereza kuno okukakasa nti ebigendererwa byakwo byonna bityukiddwako mu ngeri ematiza.

3.1 ENTEGEKA EYAGOBBERERWA.

Oluvanyuma lw'okuteekateeka obulungi ebbago ly'okunoonyereza era nga limaze okukkirizibwa mu kitongole ky'Ebyennimi n'Empuliziganya mu ssettendekero w'e Kyambogo, omunoonyereza yafuna ebbaluwa eyamwanjula mu matendekero agawaggulu omwakolerwa okunoonyereza kwe, omunoonyereza yagaba ebibuuzo ebyokujjuzibwamu eri abantu ab'enjawulo abaali babaddeko abayizi b'olulimi Oluganda ku ddaala lya sekendule. Kino kyakolebwa mu matendekero asatu ag'enjawulo omuli erya Kyambogo, Makerere, ne MUBs (Makerere University Business School); okwo ssaako bye yawa abantu abakozi mu kibuga Kampala nga baali babaddeko abayizi B'olulimi Oluganda bwe baali bakyali mu ssomero mu sekendule. Oluvanyuma omunoonyereza yeekeneenya ebyakunnyaanyizibwa era n'abiyungulula nga bwe birambikiddwa mu ssuula eyookuna ey'alipoota eno. Ku byo kwe yeesiganya okukubaganya ebirowoozo, okuweera n'okufundikira ku ngeri okusoma ebyobuwangwa ku ddaala lya sekendule gye kusobozesaamu abayizi okukuuma obutonde bw'ensi.

3.2 EBIBINJA BY'ABANTU.

Okunoonyereza kuno kwakolerwa mu Bantu abakyali abayizi mu matendekero aga waggulu era n'abo abaamala emisomo gyabwe nga baasomera ebyobuwangwa mu lulimi Oluganda ku ddaala lya sekendule. Abantu abaaliko abayizi b'olulimi Oluganda ku ddaala lya sekendule baalondebwa lwa nsonga nti be basobola okulaga obulungi oba nga ebyobuwangwa ebyabasomesebwa ku ddaala lino birina engeri gye bibayambyemu mu kwetaba mu nkola z'okukuuma obutonde bw'ensi, okuviira ddala lwe baali bakyali ku masomero gaabwe okutuukira ddala we bali mu matendekero ag'awaggulu oba mu buvunaanyizibwa obulala bwe balina mu kiseera kino.

3.3 ENNONDA Y'ABEETABA MU KUNOONYEREZA

Abantu makumi asatu (30) abaabuuzibwa baalondebwa mu matendekero agaawaggulu ag'enjawulo omuli Makerere University, Kyambogo University ne Makerere University Business School (MUBS). Baggyibwa mu biwayi by'amatendekero ag'enjawulo gamba nga ekiwayi eky'enjigiriza, eky'ebyassaayansi, eky'ebyobulambuzi, n'ebilala -- nga basomerera mirimu gya njawulo ate nga bali mu myaka jaabwe egy'okubeera mu ssettendekero egy'enjawulo. Ate abo abaamala okusoma nga mu kiseera ky'okunoonyereza kuno baali bakozi baawerera ddala amakumi asatu (30) era nga baalonderwa ku nkola ya nnakalondaganyi, nga si nenderere. N'olwekyo baalimu abakolera gavumenti, abakolera ebitongole bya nnakyewa, okwo ssaako banneekoleragyange. Abantu b'ekika kino baalimu abakyasoma, nga basoma eno bwe bakola. Omugatte gw'omuwendo gw'abo abaabuuzibwa bonna awamu baali nkaaga (60).

3.4 EKIFO KY'OKUNOONYEREZA.

Okunoonyereza kuno kwakolerwa mu disitulikiti y'e Kampala mu Bantu ba bulijjo n'abayizi mu matendekero agawaggulu. Ekitundu kya disitulikiti y'e Kampala kyalondebwa olw'okuba nti kirimu

amatendekero mangiko agasomesa olulimi Oluganda ku ddaala lya settendekero, nga kino kyayanguyiza omunoonyereza okutuukirira abayizi b'olulimi Oluganda abawerako abaasomera ebyobuwangwa mu sekendule mu masomero g'enjawulo okwetooloola eggwanga era mu myaka egy'enjawulo. Ate mu ngeri endala, ekitundu kino kirimu abantu bangiko abaamala okusoma nga kati beekolera mirimu gyabwe naye nga baasomera ebyobuwangwa mu Luganda mu sekendule mu masomero ag'enjawulo okwetooloola eggwanga mu myaka egy'enjawulo, nga mu kiseera ky'okunoonyereza kuno baali mu kwekolera mirimu gyabwe mu kibuga Kampala.

3.5 EBYEYAMBISIBWA MU KUNOONYEREZA

Omunoonyereza yeeyambisa ebibuuzo by'okujjuzaamu era byonna byesigamizibwa ku ngeri okusoma ebyobuwangwa mu sekendule gye kuwsobozesaamu abayizi okukuuma obutonde bw'ensi. Ebibuuzo bino byagabibwa eri abantu ssekinoomu (abaliiko abayizi b'Oluganda mu sekendule) aw one baweebwa ebbanga eryabamala okubijjuzaamu, n'oluvannyuma omunoonyereza yabikimayo. Ebibuuzo by'ekika kino byalondebwa lwa nsonga nti biwa omubuuzibwa ebbanga erimumala okubyanukula mu butuufu bwabyo ate nga bisobozesa omunoonyereza okufuna okuddibwamu okuva mu bantu abawererako ddala ab'ebika ebyenjawulo mu bifo ebyenjawulo mu bbanga eggere.

3.6 OBUTUUKIRIVU N'OBWESIGIKE BWEBINTU EBYAKOZESEBWA.

Ebibuuzo by'okumpapula eby'okujjuzaamu bye byakozesebwa. Enkozesa y'olulimi, obutegeerekefu bw'ebigambo ko n'enziramu y'ebibuuzo (amabanga g'okujjuzaamu) byassibwako nnyo omulaka. Omunoonyereza okukakasa nti ebikozesebwa bituukiridde era by'esigika okusobola okumutuusa ku bigendererwa by'okunoonyereza, yamala kubikkanyaako n'omulunganyama we, oluvannyuma n'abigezesereza ku bayizi banne aboomu ssettendekero w'e Kyambogo ennyanukula yaabwe n'emukakasa nti ebinaabiddibwanganamu mu kunoonyereza kwennyini binaamusobozesa okuzuula ebyo ebyetaaga okuzuulibwa mu kunoonyereza kuno.

3.7 OKWEKENNEENYA EBYAZUULIBWA.

Oluvanyuma lw'okunoonyereza, omunoonyereza yayungulula ebyokuddamu ebyajjuzibwa ku mpapula ze yali amaze okukunhaanya nga akozesa enkola eya nnakannyonnyozi, era nga emiwendo gy'abo ababa bazzeemu ekibuuzo mu ngeri efaanagana agulaga ku kipimo ky'ekikumi (%) (nga bwe birambikiddwa mu ssuula eyookuna). Bino omunoonyereza bye yeekenneenya oluvannyuma n'abyesigamako opkukubaganya ebirowoozo, okuwerera, ko n'okufundikira nga bwe kirambikiddwa mu ssuula eyookutaano ey'alipoota eno.

ESSUULA EYOOKUNA

Okwanjula, okuyungulula, n'okutaputa ebizuuliddwa.

4.1 ENNYANJULA

Okunoonyereza kuno kwagendererwamu kuzuula engeri okusoma ebyobuwangwa ku ddaala lya sekendule gye kusobozesaamu abayizi okukuuma obutonde bw'ensi. Omunoonyereza yeesigama butereevu ku bibuuzo by'okunoonyereza bino: Obutonde bw'ensi bulina bukulu ki mu kuyimirizaawo ebyobuwangwa? Ebintu by'obutonde byeyolekera bitya mu masomo g'ebyobuwangwa ku ddaala lya sekendule? Ebyobuwangwa birina mugaso ki eri okukuumibwa kw'obutonde bw'ensi?

Oluwenda olulambuluddwa mu ssuula eyookusatu eya alipoota eno lwe lwagobererwa. Ebibuuzo by'okujjaamu ebyeyambisibwa ng'enkwaso okusobola okufuna ebyetaagisa (nga bwe bisibiddwa ku nkomerero y'alipoota eno) byaddibwamu abantu abawera enkaaga (60) nga bonna baali babaddeko abayizi b'olulimi Oluganda mu sekendule. Ebibuuzo ebiwerako byazimbibwa okusobola okufuna ebyanukula ebibuuzo by'okunoonyereza byonsatule kinnakimu, era essuula eno y'eyungulula ebyo bye baayanukula.

4.2.1.0 Okuyungulula ebyayanukulwa mu bibuuzo by'ennyanjula.

Ebibuuzo by'ennyanjula (ebisatu ebisooka) byali bigenderera kukakasa nti omuntu ayanukula ebibuuzo by'okunoonyereza kuno y'oyo asaanidde okubyanukula -- yali asomeddeko ebyobuwangwa mu lulimi Oluganda ku ddaala lya sekendule.

4.2.1.1 Ekibuuzo 1: Eddaala lya sekendule walimaliriza mu mwaka ki?

Mu kibuuzo omunoonyereza yali agenderera kuzuula kiseera omuyizi mwe yamaliriza okusoma ebyobuwangwa mu ssomo ly'Oluganda ku ddaala lya sekendule. Enziramuz'ekibuuzo kino ziragiddwa mu lukangaga luno wammanga.

Olukangaga (i): Omwaka ayanuku; ebibuuzo bino mwe yamaliriza eddaala lya sekendule

Omwaka	Omuwendo gw'abayizi	Ku buli kikumi
1999	9	15%
2000	4	7%
2006	17	28%
2007	20	33%
2008	10	17%
Omugatte	60	100%

Okunoonyereza kuno kwazuula nti abayizi ebitundu asatu-mu-bisatu ku kikumi (33%) abaayanukula ebibuuzo bino baamaliriza emisomo gy'eddaala lya sekendule mu mwaka gwa 2007; abayizi abaweza ebitundu abiri mu munaana ku kikumi (28%) baamaliriza emisomo gy'eddaala lya sekendule mu mwaka gwa 2006; abayizi abaweza ebitundu kkumi-na-musanvu ku kikumi (17%) baamaliriza emisomo gy'eddaala lya sekendule mu mwaka gwa 2008; abayizi abaweza ebitundu kkumi-na-bitanu ku kikumi (15%) baamaliriza emisomo gy'eddaala lya sekendule mu mwaka gwa 1999; ate bo ebitundu musanvu ku kikumi (7%) baamaliriza emisomo gy'eddaala lya sekendule mu mwaka gwa 2000.

Kino kiraga nti abantu abawereza ddala ebitundu kyenda mu kimu ku kikumi (91%) abaabuuzibwa eddaala lya sekendule baalimaliririza mu kyasa kino eky'amakumi abiri mw'ekimu era nga sirabaasi y'olulimi Oluganda gye baagoberera mu myaka egyo y'ekyagobererwa mu nsangi zino, naddala mu kiwayi ky'Oluganda eky'ebyobuwangwa. Noolwekyo bye baafuna okuva mu masomo g'ebyobuwangwa bituwa ekifaananyi ekituufu ku ngeri ebyobuwangwa gye bisobozesaamu omuyizi okukuuma obutonde bw'ensi.

4.2.1.2 Ekibuuzo 2 a): Okola oba okyasoma?

Mu kibuuzo omunoonyereza yali agenderera kuzuula mbeera omuntu ayanukula ebibuuzo gyalimumu snonga y'okuba omukozi oba omusomi. Enziramu z'ekibuuzo kino ziragiddwa mu lukangaga luno wammanga.

Olukangaga (ii): Obukozi oba obusomi bw'oyo ayanukula ebibuuzo

Ekika ky'embeera y'obulamu	Omuwendo gwabwe	Ku buli kikumi
Abasoma nga tebakola	22	37%
Abakola nga tebakyasoma	10	16%
Abasoma nga bwe bakola	28	47%
Abatasoma era nga tebakola	0	00%
Omugatte	60	100%

Okunoonyereza kuno kwazuula nti abantu ebitundu ana-mu-mukaaga ku kikumi (46%) abaayanukula ebibuuzo bino bakyasoma ate nga basoma bwe bakola; abantu abaweza ebitundu asatu-mu-musanvu ku kikumi (37%) bakyasoma busomi, tebakola; abayizi abaweza ebitundu kkumi-na-musanvu ku kikumi (17%) tebakyasoma, baamaliriza emisomo gyabwe era kati bakola; ate ku bantu abatasoma ate nga n'okukola tebakola tewali n'omu yeetaba mu kunoonyereza kuno.

Kino nno kitegeeza nti abantu abeetaba mu kunoonyereza kuno nga bakyasoma bawera ebitundu kinaana-mu-bisatu ku kikumi (83%) nga ate ebitundu nkaaga-mu-bisatu ku kikumi (63%) bali mu nsiike y'eb'imirimu, kubanga mulimu abasoma nga bwe bakola abaweza ebitundu ana-mu-mukaaga ku kikumi (46%). Noolwekyo abantu abeetaba mu kunoonyereza kuno bamanyi bulungi engeri ebisomebwa mu masomero bwe biyambamu omuntu mu bulamu obwabulijjo era nga be batuufu okukiikirira bannaabwe okulaga ekifaananyi ekituufu ku ngeri ebyobuwangwa ebisomesebwa ku ddaala lya sekendule gye bisobozeesamu omuyizi okukuuma obutonde bw'ensi mu bulamu; nga akyali mu ssomero ne bw'aba nga amaze okusoma nga akola.

4.2.1.3 Ekibuuzo 2 b): Bw'oba okola, okola mulimu gwa kika ki mu kiseera kino?

Mu kibuuzo kino omunoonyereza yali agenderera kuzuula mbeera ya kukola omuntu ayanukula ebibuuzo gy'alimu; akolera kitongole kyagavumenti, kya nakyewa, oba munnabbiizinensi (nneekoleragyange). Enziramu z'ekibuuzo kino ziragiddwa mu lukangaga olwokusatu.

Olukangaga (iii): Ekika ky'omulimu oyo ayanukula ebibuuzo gw'akola

Ekika ky'embeera y'omulimu	Omuwendo gwabwe	Ku buli kikumi
Abakolera gavumenti	3	8%
Abakola ebitongole bya nakyewa	15	40%
Banneekoleragyange	20	52%
Omugatte	38	100%

Okunoonyereza kuno kwazuula nti abantu ebitundu ataanu-mu-bibiri ku kikumi (52%) abaayanukula ebibuuzo bino banneekoleragyange; ate abaweza ebitundu amakumi ana ku kikumi (40%) bakolera bitongole bya nnakyewa; ate bo abakolera gavumenti baweza ebitundu munaana ku kikumi (8%).

4.2.1. 4 Ekibuuze 2 c): Bw'oba osoma, osomerera mulimu ki?

Mu kibuuze omunoonyereza yali agenderera kuzuula kiwayi ky bya nsoma omuyizi akyasoma by'akugukamu, nga era kino kyoleka n'omulimu gw'atekerwatekerwa. Enziramu z'ekibuuze kino ziragiddwa mu lukangaga luno wammanga.

Olukangaga (iv): Omulimu omuyizi ayanukula ebibuuze gw'asomerera

Omulimu	Omuwendo gwabwe	Ku buli kikumi
Busomesa	20	40%
Nkwataganya z'embeera y'abantu	7	14%
Bya bulambuzi	4	8%
Bya mateeka	2	4%
Busawo	4	8%
Bya busuubuzi	6	12%
Bya mikono	7	14%
Ekilala kyonna	0	00%
Omugatte	50	100%

Okusinziira ku byayanukulwa mu kibuuze 4.1.2.1 waggulu, abantu abeetaba mu kunoonyereza kuno nga bakyasoma bawera ebitundu kinaana-mu bisatu ku kikumi (83%), abamu basoma busomi (37%) so nga abalala bakola ng'eno bwe basoma (46%). Mu bano bonna, abantu ebitundu ana ku kikumi (40%) basomerera busomesa, kkumi-na-bana ku kikumi (14%) bya mikono, kkumi-na-bana ku kikumi (14%) bya nkwataganya y'embeera z'abantu, kkumi-na-babiri ku kikumi (12%) bya bbiizinensi, munaana ku kikumi (8%) bya bulambuzi, munaana ku kikumi (8%) bya busawo, ate bo abaweza ebitundu bina ku kikumi (4%) bya bwalooya.

4.2.1.5 Ekibuuzo 3: Essomo ly'ebyobuwangwa wakoma kulisoma nga oli mu kibiina ki?

Ekibuuzo kino kyagendererwamu kuzuula eddaal lya sekendule omuntu ayanukula ebibuuzo bino kwe yakoma okusoma ebyobuwangwa nga kino kisobola okwoleka obukugu mu byo bwe yafuna obusembayo okuba obwawaggulu mu ngeri y'emu ekibuuzo kino kiyamba okuzuula ebbanga eryakayita bukya ayanukula ebibuuzo bino amaliriza kusoma byabuwangwa. Enziramu y'ekibuuzo kino eragiddwa mu lukangaga luno wammanga.

Olukangaga (v): Eddaala ly'ebyenjigiriza omuntu ayanukula ebibuuzo bino kwe yakoma okusoma ebyobuwangwa.

Eddaala	Omuwendo gwabwe	Ku buli kikumi
Yunivaasite	27	45%
Siniya eyoomukaaga	23	38%
Siniya eyookuna n'okudda wansi	10	16%
Omugatte	60	100%

Okunoonyereza kuno kwazuula nti abantu ebitundu ana-mu-bitaanu ku kikumi (45%) abaayanukula ebibuuzo bino ebyobuwangwa baabisomera ddala mpaka ku Yunivaasite; abantu ebitundu asatu-mu-munaana ku kikumi (28%) ne babisoma kukoma ku ddaala lya nsenvuddeko; ate bo abaweza ebitundu kkumi-na-mukaagaku kikumi (16%) ebyobuwangwa baabisoma butasussa ddaala lyowabulijjo.

Kino kiraga nti abantu ebitundu kinaana-mu-bina ku kikumi (84%) abaayanukula ebibuuzo bino baasoma ebyobuwangwa ku ddaala lya nsenvuddeko era nga kino kiraga nti baabifunamu obumanyi

obumala omuntu okumanya ngeri ki gye biyinza okubasobozesaamu okukuuma obutonde bw'ensi, kubanga ku ddaala lino ebyobuwangwa ebiwerako bisomesebwa okugendako mu buziba byabyo kinnakimu. Noolwekyo bye baanukula mu kunoonyereza kuno bituwa ekifaananyi ekyesigika ku ngeri ebyobuwangwa ebisomenwa ku ddaala lya sekendule (lyonna awamu) gye bisobozesaamu omuyizi okukuuma obutonde bw'ensi.

4.2.2.0 Ekibuuzo ky'okunoonyereza ekisooka:

Obutonde bw'ensi bulina bukulu ki mu kuyimirizaawo ebyobuwangwa?

Ekibuuzo kino kyaggyibwa mu kigendererwa ky'okuzuula obukulu bw'obutonde bw'ensi mu kuyimirizaawo ebyobuwangwa. Mu lukalala lw'ebibuuzo ebyayanukulwa abantu bonna abeetaba mu kunoonyereza kuno, ebibuuzo bina: 4, 5, 6, 7 ne 8 byagenderera kukakasa nti ekibuuzo ky'okunoonyereza kino kyanukulwa mu ngeri eyesigika era ematiza. Wano wammanga bye byazuulibwa ku bibuuzo ebyakigendeako.

4.2.2.1 Ekibuuzo 4): Ekigambo “obutonde bw'ensi” okitegeera otya?

Ekibuuzo kino kyagendererwamu kuzuula amakulu g'ekigambo “obutonde bw'ensi” era n'okumanyira ddala engeri abantu abaayanukula ebibuuzo bino gye bakitegeeramu. Enziramumu y'ekibuuzo kino eragiddwa mu lukalala lwa sentensi zino wammanga ze bajjuza ku kibuuzo kino.

- Obutonde bw'ensi bye bintu ebiri mu nsi nga byatondebwa katonda nga si muntu eyabitandikawo.
- Obutonde bw'ensi bye bintu ebitwetoolodde bye tweyambisa nga byatondebwa...

• Emigga • Ennyanja • Ensozi • Emiti • Ebibira • Enkuba • Omusana (enjuba) • Omwezi • Emmunyeenye	• Ensozi • Entobazi • Ebiwonvu • Ebikko • Ettaka • Ebimera • Amayinja • Ebyennyanja • Omukka gwe tussah	• Ebisolo • Abantu • Enzizi • Ebinyonyi • Ebiwuka • Omuddo • Essubi • Ebimuli
---	---	--

Okusinziira ku byazuulibwa, abantu abaaliko abayizi b'olulimi Oluganda mu sekendule, abeetaba obutereevu mu kunoonyereza kuno bamanyi era baawa ebintu ebyenjawulo abiri-mu-mukaaga (26) ebikola obutonde bw'ensi.

4.2.2.3 Ekibuuzo 6): Nkola ki z'omanyi ezoonoona obutonde bw'ensi?

Ekibuuzo kino kyagendererwamu kuzuula nkola eziyinza okwonoona obutonde bw'ensi. Enziramu y'ekibuuzo kino eragiddwa mu lukalala luno olw'amannya g'ebintu ebyenjawulo ge bajjuza ku kibuuza kino.

• Okusala omuddo entakera • Okukola amakolero agafulumya ebikkakka ebibi	• Okuvuba obwenyanja obuto • Okuyiwa ettaka mu ntobazi • Obujama
---	--

• Okutema ebibira • Okwokya empiira • Okukozesa omukka gw'obutwa okugeza, mu ntalo. • Okusenga mu bibira • Okuzimba mu ntobazi • Okusenga abantu abangi mu kifo ekitono	• Okusuula kazambi mu myala • Okulundira mu kifo ekimu ne kikuusiira • Okusuula obuveera buli wamu • Ennima embi • Okwokya ebintu bya pulasitiika ne bivaamu ogukka ogubi
--	---

Okusenziira ku byazuulibwa, enkola ez'enjawulo kkumi-na-mukaaga (16) ze zimanyiddwa ng'ezoonoona obutonde bw'ensi ezaaleetebwa abantu abaaliko abayizi b'olulimi Oluganda mu sekendule, abeetaba obutereevu mu kunoonyereza kuno.

4.2.2.4 Ekibuuzo 7): Kabi ki akayinza okuva mu kwonooneka kw'obutonde bw'ensi?

Ekibuuzo kino kyagendererwamu kuzuula akabi akayinza okuva mu kwonooneka kw'obutonde bw'ensi. Enziramu y'ekibuuzo kino eragiddwa mu lukalala lw'amannya g'ebintu ebyenjawulo ge bajjuza ku kibuuzo kino era nga ge gano wammanga.

• Amataba • Ekyeya • Enjala • Okukendeera kw'ebyobulambuzi	• Ebisolo byomuttale okulumba amaka g'abantu • Okubalukawo kw'endwadde ng'omusujja • Okubulwa ebizimbisibwa ennyumba
---	--

• Okukendeera kw'obuwangaazi bw'abantu • Okuyigulukuka kw'ettaka • Omuyaga omungi	• Okufa kw'ensolo, ebiwuka n'ebinyonyi • Okukyankalana kw'embeera y'obudde • Okwonooneka kw'obulungi bw'ensi (endabika y'ensi)
---	--

Okusinziira ku byazuulibwa, ebizibu eby'enjawulo kkumi-na-bisatu (13) bye biyinza okugwawo olw'okwonooneka kw'obutonde bw'ensi ebyaleetbwa abantu abaaliko abayizi b'olulimi Oluganda mu sekendule, abeetaba obutereevu mu kunoonyereza kuno.

4.2.2.5 Ekibuuzo 8 a): Waliwo ebyobuwangwa bye mwasomanga nga okubissa mu nkola kwesigama ku butonde bw'ensi?

Ekibuuzo kino kyagendererwamu kuzuula oba nga waliwo ebyobuwangwa ebisomesebwa mu sekendule nga okubissa mu nkola kwesigama ku butonde bw'ensi. Enziramu yaakyo eragiddwa mu lukangaga luno wammanga.

Olukangaga (vi): Okulaga oba nga ebyobuwangwa ebisomesebwa mu sekendule okubissa mu nkola kwesigama ku butonde bw'ensi

Okuddamu	Omuwendo	Ku buli kikumi
Yee	60	100%
Nedda	0	00%
Omugatte	60	100%

Okunoonyereza kuno kwazuula nti abantu bonna (100%) abaayanukula ebibuuzo by'okunoonyereza kuno bakkiriza nti okussa mu nkola ebyobuwangwa ebisomesebwa mu sekendule kwesigama ku butonde bwa nsi; tewali baakiwakanya.

4.2.2.6 Ekibuuzo 8 b): Bwe kiba yee, menyaayo by'ojjukira

Ekibuuzo kino kyagendererwamu kuzuula byabuwangwa ebisomesebwa mu sekendule nga okubissa mu nkola kwesigama ku butonde bwa nsi. Ebyobuwangwa ebyamenyebwa byonna awamu bye bino wammanga:

- Emirimu gy'Abaganda omuli okulima, okuyigga, okulunda, okuvuba, okukomaga, okuweesa, okubumba, okuzimba enju.
- Emizizo ng'ogw'obutafuka mu luzzi, ogw'obutafumbisa miti egimu ng'olukandwa, n'emirala
- Envumula y'endwadde mu Buganda
- Emizannyo emiganda nga ggoogolo, okukuba enkuyo, sekitulege, ekigwo ekiganda.
- Eddiini y'Abaganda ey'ennono (okusamira mu Buganda)
- Olulimi Oluganda (amannya agalulimu agasinga obungi ga bintu bya butonde)
- Omuganda n'ensiko okugeza, empisa y'okukyalira ensiko
- Obufumbo mu Buganda okugeza omutwalo oguweebwayo mu kugula omukazi
- Omuganda n'ezzadde (enkuza n'endabiria y'abaana)
- Omuganda n'enswa (n'obutiko bwakwo)
- Okutta omukago (emmwanyi eyeeyambisibwa ya butonde)
- Okutabaala (engabo n'amafumu bikolebwa mu bitnu bya butonde gamba ng'emititi)
- Enjanda nga obuko, obujjwa n'endala ezikuzibwa nga tqweyambisa eby'obutonde gamba ng'enkoko eweebwa omuko akyadde.

Okunoonyereza kuno kwlaga nti ebyobuwangwa ebiwerera ddala kkumi-na-bisatu (13) ebisomesebwa mu sekendule byetaaga obutonde bw'ensi okusobola okubituukiriza oba okubissa mu nkola.

4.2.2.7 Ekibuuzo 8 c): Bwe kiba nedda, olowooza waliwo kye wasubwa? Nnyonnyola.

Olw'enziramu y'ekibuuzo 8 a) eagiddwa mu lukangaga waggulu, tewali baawakanya nsonga ya kuba nti ebyobuwangwa ebisomesebwa ku ddaala lya sekendule byetaaga obiutonde bw'ensi okusobola okubissa mu nkola. Noolwekyo ekibuuzo kino (8 c)) tewali baakyanukula.

4.2.3.0 Ekibuuzo ky'okunoonyereza ekyokubiri:

Ebintu by'obutonde byeyolekera bitya mu masomo g'ebyobuwangwa ku ddaala lya sekendule?

Ekibuuzo ky'okunoonyereza kino ekyokubiri kyaggyibwa mu kigendererwa ky'okuzuula engeri ebintu by'obutonde gye byeyolekera mu masomo g'ebyobuwangwa ku ddaala lya sekendule. Mu lukalala lw'ekibuuzo ebyayanukulwa abantu bonna abeetaba mu kunoonyereza kuno, ekibuuzo bisatu okuva ku kyomwenda okutuuka ku ky'ekkumi-n'ekimu (9–11) byagenderera kukakasa nti ekibuuzo ky'okunoonyereza kino kyanukulwa mu ngeri eyeesigika era ematiza. Wano wammanga bye byazuulibwa ku bibuuzo ebyakigenderako.

4.2.3.1 Ekibuuzo 9) Ekigambo ebyobuwangwa okitegeera otya?

Ekibuuzo kino kyagendererwamu kuzuula makulu g'ekigambo 'Ebyobuwangwa', era nga ebyakyanukulwa biragiddwa mu sentensi zino wammanga nga bwe zaakijjuzibwako.

- Ebyobuwangwa ye ngeri abantu b'ekitundu ekimu gye beeyisaamu.

- Ebyobuwangwazennono abantu ze bagoberera nga zaatandikibwawo bajjajja baabwe
- Ebyobuwangwa ye mpisa abantu b'ekiti ekimu gyebeeyisaamu.
- Ebyobuwangwa ye ngeri abantu gye bakolamuebintu byabye nga ebaawula ku Bantu abalala.
- Ebyobuwangwa bye bintu ebikolebwa abantu b'eggwanga erimuebikikirizibwa mu kitundu kyabwe.
- Ebyobuwangwa ze nnono, emizizo, n'emirimu abantu b'eggwanga erimu bye bakkiriza era bye bagoberera.
- Ebyobuwangwaze mpisa n'obulombolombo obweyolekera mu kika ky'abantu abava awamu.
- Ebyobuwangwa bye bintu ebiyamba abantu b'omu kitunduekimu okukwatagana obulungi.
- Ebyobuwangwa ze mpisa n'engeri ze tutambuliramu mu bulamu bwaffe obwabulijjo.
- Ebyobuwangwa ze mpisa z'ab'omuliraano ezibagatta awamu okuba ab'ekiwayi ky'abantu ekyetongodde.
- Ebyobuwangwa bye bintu abantu bye bakkiririzaamu naddala ebibagatta awamu.
- Ebyobuwangwa ye ngeri abantu ab'oluse olumu gye bagoberera okusinziira ku nnono, obulombolombo, emikolo n'emizizo gyabwe.
- Ebyobuwangwa byebintuebikolebwa amawanga gonna mu nsi naye nga buli ggwanga libaako n'enkola ey'enjawulo gye babikolamu.
- Ebyobuwangwa bye bintu ebikolebwa eggwanga erimu nga ebintu ebyo byava dda.
- Ebyobuwangwa ze mpisa awamu n'embeera y'eggwanga erimu.

- Ebyobuwangwa bwe bugagga bw'abantu b'obuvo obumu obubaawula ku Bantu abalala.
- Ebyobuwangwa ye njawulo y'abantu b'amawanga ag'enjawulo.
- Ebyobuwangwa kwe kwetengerera kw'abantu b'ensibuko efaanagana.

Okunoonyereza kuno kwalaga nti abantu abaaliko abayizi b'olulimi Oluganda mu sekendule abeetaba obutereevu mu kunoonyereza kuno bategeera bulungi ekigambo "Ebyobuwangwa" era nga baasobola okuwa ennyinyonnyola ez'enjawuloo kkumi-na-munaana (18) eziwa amakulu g'ekigambo ebyobuwangwa.

4.2.3.2 Ekibuuzo 10) Menyaayo ebyobuwangwa by'ojjukira bye wasomera mu sekendule.

Ekibuuzo kino kyagendererwamu kuzuula byabuwangwa ebisomesebwa mu ssomo ly'olulimi Oluganda mu sekendule. Enziramu y'ekibuuzo kino erambikiddwa mu bigambo bino wammanga ebyakijuzibwako.

• Omuganda n'okufa • Omuganda n'ensiko • Obufumbo mu Buganda • Omuganda n'enswa • Emmere enjanda • Omuganda n'enjanda • Emirimu gy'Abaganda	• Emizannyo gy'Abaganda • Omuganda n'ezzadde • Enfuga mu Buganda • Olulimi Oluganda Amakula • Enzijanjabu n'envumula y'endwadde mu Buganda • Ennyambala enjanda • Obuko mu Buganda
---	--

• Eddiini y'Abaganda ey'ennono • Okutta omukaga mu Buganda • Okutabaala kw'Abaganda	• Ebintu ebikulu mu luggya lw'omuganda • Omuganda n'obutiko
---	--

Okunoonyereza kuno kulaga nti abantu abaaliko abayizi b'olulimi Oluganda mu sekendule bamanyi ebyobuwangwa ebiwerera ddala kkumi-na-mwenda (19) ebisomesebwa mu sekendule ebyetaaga obutonde bw'ensi okusobola okubituukiriza oba okubissa mu nkola.

4.2.3.3 Ekibuuzo 11 a) Waliwo ebintu by'obutonde by'ojjukira nga byabayambanga mmwe ng'abayizi okutegeera ebyobuwangwa bye mwasomanga?

Ekibuuzo kino kyagendererwamu kuzuula oba nga abayizi b'ebyobuwangwa baamanyanga nti bye basoma bikwatagana butereevu ku butonde bw'ensi; ate era n'okuzuula oba nga abasomesa balina engeri gye beesigama ku bintu ebyetoolodde abayizi ku somero eby'obutonde mu masomo g'ebyobuwangwa. Enziramu y'ekibuuzo kino eragiddwa mu lukangaga luno wammanga.

Olukangaga (vii): Eby'obutonde okuyambanga abayizi okutegeera ebyobuwangwa ebyabasomesebwanga

Okuddamu	Omuwendo	Ku buli kikumi
Yee	60	100%
Nedda	0	00%
Omugatte	60	100%

Okunoonyereza kuno kwazuula nti abantu bonna (100%) abaayanukula ebibuuzo by'okunoonyereza kuno bakkiriza nti ebintu by'obutonde byabayambanga ng'abayizi okutegeera ebyobuwangwa bye baasomanga; tewali baakiwakanya.

b) 4.2.3.4 Ekibuuzo 11 b) Bwe kiba yee, bimenye nga ku buli kimu olaga ekyobuwangwa kwe kyabayambira.

Ekibuuzo kino kyagendererwamu kuzuula ebintu by'obutonde byennyini ebiyamba abayiziokutegeera ebyobuwangwa ebisomesebwa, era n'okuzuula kyabungwa ki ekyategeerwanga mu kukikwataganyan'obutonde bw'ensi. Enziramumu y'ekibuuzo kino eragiddwa mu lukangaga luno wammanga.

Olukangaga (viii): Eby'obutonde nga bwe biyamba mu masomo g'ebuwangwa

Eky'obutonde	Eky'obuwangwa
➤ Omutuba	Okukomaga
➤ Omuddo, emiti, n'ettaka	Okuvumula endwadde mu Buganda
➤ Ettale	Omuganda n'ensiko
➤ Ebiswa, Obutiko	Omuganda n'obutiko
➤ Emiti	Okutabaala kw'Abaganda (engabo zikolebwamu miti)
➤ Emmwanyini	Okutta omukaga mu Buganda
➤ Ettaka, Ensiko, emiti	Emirimu gy'Abaganda
➤ Ebimera, Omuddo, Ettaka	Emmere enjanda
➤ Ebiswa, Ebiwuka	Omuganda n'enswa
➤ Ebiwuka (Enswa)	Obufumbo mu Buganda (omutwalo ogugula omukazi guba)

	gwa nswa)
➤ Omutuba	Ennyambala enḡanda (olubugao, olugoye oluganda luva mumutba)
➤ Ebinyonyi	Obuko mu Buganda (omuko nkoko)
➤ Emiti, ettaka, ebisubi	Ebintu ebikulu mu luggya lw'omuganda (ebisinga obungi bikolebwa mu miti, ttaka na ssubi)
➤ Emiti, Ettaka, Omuddo	Enzijanjabā n'envumula y'endwadde mu Buganda
➤ Emiti, Ettaka, Omuddo n'ebisubi	Emizannyo gy'Abaganda (ebyeyambisibwa mu mizannyo bitera kuva mu miti, Ettaka, Omuddo n'ebisubi)
➤ Ensolo, ebinyonyi	Eddiini y'Abaganda ey'ennono (bye tweyambisa mu kusaddaakira balubaale bitera kuba binyonyi na bisolo)
➤ Amalagala ga lumonde	Geeyambisibwa abayizi nga bamaala olubaawolwe basomerako.

Okunoonyereza kwazuula ebyobuwangwa ebiwerera ddala kkumi-na-mukaaga (16) nga byonna okubisomesa n'abayizi okubitegeera kyetaagisa kweyambisa bintu byabutonde ebyeyambisibwa mu kutuukiriza ebyobuwangwa ebyo.

4.2.3.5 Ekibuuzo 11 c) Bwe kiba nedda, bintu ki ebyabayambanga okutegeera ebyobuwangwa?

Olw'enziramu y'ekibuuzo 11 a) eragiddwa mu lukangaga waggulu, tewali baawakanya nsonga ya kuba nti ebyobuwangwa ebyabasomesebwanga okubitegeera kyetaagisanga kweyambisa bintu byabutonde ebyeyambisibwa mu kutuukiriza ebyobuwangwa ebyo, era ne balaga ekintu ky'obutonde buli kyabuwangwa kye kyetaaga okusolaokutegeerekeka obulungi mu kibiina. Noolwekyo ekibuuzo kino (11 c)) tewali baakyanukula.

4.2.4 Ekibuuzo ky'okunoonyereza ekyokusatu:

Ebyobuwangwa birina mugaso ki eri okukuumibwa kw'obutonde bw'ensi?

Ekibuuzo ky'okunoonyereza kuno ekyokusatu kyaggyibwa mu kigendererwa ky'okuzuula omugaso gw'ebyobuwangwa eri okukuumibwa kw'obutonde bw'ensi. Mu lukalala lw'ebibuuzo ebyayanukulwa abantu bonna abeetaba mu kunoonyereza kuno, ebibuuzo bina: 12, 13, 14, ne 15 byagenderera kukakasa nti ekibuuzo ky'okunoonyereza kino kyanukulwa mu ngeri eyeesigika era ematiza. Wano wammanga bye byazuulibwa ku bibuuzo ebyakigenderako.

4.2.4.1 Ekibuuzo 12) Okukuuma obutonde bw'ensi kitegeeza ki?

Ekibuuzo kino kyagendererwamu kuzuula makulu g'ekigambo 'Okukuuma obutonde bw'ensi'. Ennnyanukula y'ekibuuzo kino y'eyo erambuluddwa mu lukalala lwa sentensi zino wammanga nga bwe zaakijjuzibwako.

- Okukuuma obutonde bw'ensi bwe butataataaganya nkola n'enfaanana y'ebintu eby'obutonde.
- Okukuuma obutonde bw'ensi kwe kuleka ebitonde byakatonda nga bwe biri.
- Okukuuma obutonde bw'ensi bwe butayonoona bintu ebitwetooolodde.
- Okukuuma obutonde bw'ensi ye ngeri erekera obutonde eddembe lyabwo.
- Okukuuma obutonde bw'ensi ye ngeri y'okuddaabirizangamu ebintu by'obutonde ebitwetooolodde.
- Okukuuma obutonde bw'ensi kwe kuleka obutonde mu ngeri gye bwatondebwamu era gye tuba tubusanzeemu
- Okukuuma obutonde bw'ensi nga bwe tubusanze mpozzi n'okubuwagira nga tubwongerezaako, gamba nga okuyita mu kusimba emiti emirala.

- Okukuuma obutonde bw'ensi kwe kukuumira ebintu by'obutonde mu bifo mwe byatonderwa, ne tutabisengula.
- Okukuuma obutonde bw'ensi kwe kulongoosa ebintu by'obutonde ate netubikumira mu bulongoofu obwo.
- Okukuuma obutonde bw'ensi kwe kwewala okuggya ebintu by'obutonde mu mbeera yaabyo, okugeza nga twewala okuzimba mu ntobazi.
- Okukuuma obutonde bw'ensi ye ngeri ey'amagezi omuntu mw'ayita okweyambisa ebintu by'obutonde ebimwetooldde wabula n'atabimalaawo wadde okubyonoona wabula n'abirongoosanako we kyetaagisirizza.
- Okukuuma obutonde bw'ensi kwe kataliza obutonde buleme kutuukibwako mitawaana egiyinda okubwonoona.
- Okukuuma obutonde bw'ensi kwe kubuteeka mu mbeera ebuwangaaza ne butasaanawo.
- Okukuuma obutonde bw'ensi kwe kukuumira ebintu Katonda bye yatutondera nga tubikwata bulungi n'obuvunaanyizibwa.
- Okukuuma obutonde bw'ensi kwe kuva ku nkola ezisaanyaawo oba okwonoona ebintu by'obutonde.
- Okukuuma obutonde bw'ensi kwe kweyambisa eby'obutonde bye tulina mu ngeri ebissaamu ekitiibwa.
- Okukuuma obutonde bw'ensi kwe kubikozesa nga tataliza ebiriyamba emirembe egiriddawo.

Okunoonyereza kuno kulaga nti abantu abaaliko abayizi b'olulimi Oluganda mu sekendule bamanyi amakulu g'ekigambo 'Okukuuma obutonde bw'ensi' era nga baawa ennyinyonnyola zaakyo ez'enjawulo eziwerera ddala kkumi-na-musanvu (17).

4.2.4.2 Ekibuuzo 13 a) Olowooza waliwo obwetaavu bw'okukuuma obutonde bw'ensi mu nsangi zino?

Ekibuuzo kino kyagendererwamu kuzuula oba nga waliwo obwetaavu bw'okukuuma obutonde bw'ensi mu nsangi zino. Enziramu y'ekibuuzo kino eragiddwa mu lukangaga luno wammanga.

Olukangaga ix : Obwetaavu bw'okukuuma obutonde bw'ensi mu nsangi zino

Okuddamu	Omuwendo	Ku buli kikumi
Yee	60	100%
Nedda	0	00%
Omugatte	60	100%

Okunoonyereza kuno kwazuula nti abantu bonna (100%) abaayanukula ebibuuzo by'okunoonyereza kuno bakimanyi era bakikiriza nti waliwo obwetaavu bw'okukuuma obutonde bw'ensi mu nsangi zino.

4.2.4.3 Ekibuuzo 13 b) Bwe kiba yee, lwaki?

Ekibuuzo kino kyagendererwamu kuzuula nsonga eziraga obwetaavu bw'okukuuma obutonde bw'ensi mu nsangi zino. Ennnyanukula y'ekibuuzo kino y'eyo erambuluddwa mu lukalala lwa sentensi zino wammanga nga bwe zaakijuzibwako.

- Twetaaga okukuuma obutonde bw'ensi ensangi zino okusobola okubeera n'emmere emala abantu bonna wadde ngabeeyongeraobungi buli olukya.
- Twetaaga okukuuma obutonde bw'ensi ensangi zino okusobola okukuuma eby'obulambuzi mu ggwangalyaffe.
- Twetaaga okukuuma obutonde bw'ensi ensangi zino okusobola okugema n'okubeeran'eddagala ly'agalwadde nnamutta agacaaseensangi zino.

- Twetaaga okukuuma obutonde bw'ensi ensangi zino okusobola okukendeeza obulabe bw'ensolo eri abantu.
- Twetaaga okukuuma obutonde bw'ensi ensangi zino okusobola okukuuma endabika ennungi ey'ensi yaffe.
- Twetaaga okukuuma obutonde bw'ensi ensangi zino okusonbola okufunanga omukka omulungi gwe tussah ogwobulamu.
- Twetaaga okukuuma obutonde bw'ensi ensangi zino okusobola okwongeza ku buwangaazi bw'abantu obuzze bukendeera obutasalako.
- Twetaaga okukuuma obutonde bw'ensi ensangi zino okusobola okutaakiriza ku kukyukakyuka kw'embeera y'obudde okutubonyaabonya ennyo ensangi zino.
- Twetaaga okukuuma obutonde bw'ensi ensangi zino okusobola okukendeezakubyeya n'ebbugumu ebijja byeyongera ensangi zino.
- Twetaaga okukuuma obutonde bw'ensi ensangi zino okusobola okukuuma obusikabw'ebyobuwangwabyaffe kubanga byesigama butereevu ku butonde bw'ensi.
- Twetaaga okukuuma obutonde bw'ensi ensangi zino kubanga katondyalina ekigendererwa mu kubitonda era nga bwe tubikkakkanako okubyonoona tuba tumukoze bubi.

Okunoonyereza kuno kwalaga nti abantu abaaliko abayizi b'olulimi Oluganda mu sekendule abeetaba obutereevu mu kunoonyereza kuno bakiraba bulungi nti waliwo obwetaavu bw'okukuuma obutonde bw'ensi mu nsangi zino; era nga baasobola okuwa ensonga ez'enjawuloo kkumi-neemu (11) okukakasa obwetaavu obwo.

4.2.4.4 Ekibuuzo 13 c) Bwe kiba nedda, lwaki?

Olw'enziramu y'ekibuuzo 13 a) eragiddwa mu lukangaga waggulu, tewali baawakanya nsonga ya kuba nti ebyobuwangwa ebyabasomesebwanga okubitegeera kyetaagisanga kweyambisa bintu byabutonde ebyeyambisibwa mu kutuukiriza ebyobuwangwa ebyo, era ne balaga ekintu ky'obutonde buli kyabuwangwa kye kyetaaga okusolaokutegeerekeka obulungi mu kibiina. Noolwekyo ekibuuzo kino (13 c)) tewali baakyanukula.

4.2.4.5 Ekibuuzo 14 a) Waliwo ebyobuwangwa bye mwasoma nga birina engeri gye bikuumamu obutonde bw'ensi singa biba bissiddwa mu nkola?

Ekibuuzo kino kyagendererwamu kuzuula oba nga ebyobuwangwa ebisomesebwa mu sekendule birina engeri gye bikuumamu obutonde bw'ensi singa biba bissiddwa mu nkola. Ekibuuzo kino kye kiggyirayo ddala omulamwa gw'okunoonyereza kuno kubanga kiragira ddala oba nga abayizi balaba omugaso gw'ebyo ebibasomesebwa mu kukuuma obutonde bw'ensi. Enziramu y'ekibuuzo kino eragiddwa mu lukangaga luno wammanga.

Olukangaga (x): Obusobozi bw'ebyobuwangwa ebisomesebwa mu kukuuma obutonde bw'ensi

Okuddamu	Omuwendo	Ku buli kikumi
Yee	60	100%
Nedda	0	00%
Omugatte	60	100%

Okunoonyereza kuno kwazuula nti abantu bonna (100%) abaayanukula ebibuuzo by'okunoonyereza kuno bakikiriza nti ebyobuwangwa by'Abaganda ebisomesebwa mu sekendule birina obusobozi okukuuma obutonde bw'ensi singa biba bissiddwa mu nkola.

4.2.4.6 Ekibuuzo 14 b) Bwe kiba yee, bimenye nga olaga n'engeri buli kimu gye kiyinza okuyamba okukuuma obutonde bw'ensi.

Ekibuuzo kino kyagendererwamu kuzuula byabuwangwa byennyini ebisomesebwa mu sekendule ebisobola okuyamba okukuuma obutonde bw'ensi bwe biba bissiddwa mu nkola, nga buli kimu ku byo kiragibwa n'engeri gye kiyinza okusobozesaamu okukuumibwa kw'obutonde bw'ensi. Ennyanukula y'ekibuuzo kino yavaamu eby'okuddamu ebiwerera ddala era wammanga lwe lukangaga olulaga ekyobuwangwa ku ludda olwa kkono n'engeri gye kisobozesaamu okukuuma obutonde bw'ensi nga eragiddwa ku mukono ogwa dddyo okukyolekera.

Olukangaga (xi): Ebyobuwangwa ebisomesebwa, n'engeri gye biyambamu okukuuma obutonde bw'ensi.

Ekyobuwangwa	Engeri gye kiyambamu okukuuma obutonde bw'ensi.
➤ Okuvumula endwadde mu Buganda	▪ Okusimba emiti gy'eddagala olwo ne giriisa embeera y'obudde ennungi.
➤ Omulimu gw'okulima	▪ Ebirime ebimu gamba nga ebijanjaalo bigimusa ettaka mu ngeri y'obutonde so si ey'ekinnassaayansi. ▪ Okuyiikuula ettaka kuliwa obussizo olwo ne libeera ddamu nga n'obugimu ligimu.
➤ Omuganda n'ensiko	▪ Ebitundu ebimu byatalizibwanga mu kulima n'esigala nga nsiko awo obutonde ne butataataaganyizibwa. ▪ Ettale (ensiko n'emiti) bitereeza embeera y'obudde okuyita mu kukola enkuba. ▪ Ettale (ensiko n'emiti) bikuuma embeera y'ebbugumu ku ssenqendo ono Nabulamu nga terisukkulumye kw'eryo lye twetaaga.
➤ Omuganda n'enswa	▪ Okukuumanga ekikula ky'ettaka nga ebiswa tebisendebwa anti kubuukako enswa okugeza ensejjere
➤ Okutta omukago mu	▪ Kuwaliriza abantu okulima emmwanyi z'okukozesa mu

Buganda	kuttaomukago aten'ez'okugabulanga owoomukago nga akyadde
➤ Omuganda n'obutiko	▪ Okukuumanga ekikula ky'ettaka nga ebiswa tebisendebeba anti kumerako obutiko, okugeza obutiko obusejjere.
➤ Emizannyo gy'Abaganda	▪ Okukuumama amazzi nga mayonjo okusobola okuwugiramu. ▪ Ebintu ebizannyisibwa oluvannyuma bibikkibwa mu lusuku ne birugimusa, okugeza essanja eryeyambisibwa mu kusiba kantuntunu.
➤ Enfuga mu Buganda	▪ Abafuzi, okugeza Owoomuluka okulimisa abantu n'okubasimya zikaabuyonjo ekitumbula obuyonjo awamu n'okukuumama ebibala n'emmere ebitumbula embeera y'obudde ennungi mu nsi.
➤ Olulimi Oluganda Amakula	▪ Lano luyiyizibwamu ennyimba, engero, ebisoko, enjogera, ebitontome, ebikocco n'ebikokko nga bikubiriza abantu okukuumama obutonde bw'ensi. Ne mu misomo gy'okutumbula obutonde bw'ensi Oluganda lusaale nnyo mu kweyambisibwa.
➤ Obuko mu Buganda	▪ Kireetera Abaganda okulundanga enkoko y'okwa omuko anti omuko nkoko.
➤ Okukomaga	▪ Okukozesa omutuba naye ne gitatemebwawo kikuuma ensi nga erimu emiti ate emiti ng'egyo eminene gye gikuuma ettaka obutakuluggusibwa mukoka.
➤ Enziika y'abantu mu Buganda	▪ Kuziikaomuntu mu mbugo ezituuka ekiseera ne zifuuka ettaka kikuuma obutonde bw'ettaka.
➤ Obuntubulamu (empisa)	▪ Abantu ab'empisa ennungi bassaamu obutonde ekitiibwa era tebabutabangula, okugeza tebayinza kuyiwa kazambi mu myala, ekiyambako okukuumama obuyonjo bw'amazzi n'ettaka.

Okunoonyereza kuno kwazuula engeri kkumi-na-musanvu (17) ezikuuma obutonde bw'ensi okuyita mu byobuwangwa by'Abaganda kkumi-na-bisatu (13) eby'enjawulo, nga byaleetebwa abantu abaasoma eby'obuwangwa mu sekendule abeetaba obutereevu mu kunoonyereza kuno. Kino era

kuiraga nti ebimu ku byobuwangwa bino biyamba okukuuma obutonde bw'ensi mu ngeri ezisukkamw'emu.

4.2.4.7 Ekibuuzo 14 c) Bwe kiba nedda, olowooza tuyinza tutya okweyambisa ebyobuwangwa okusobola okukuuma obutonde bw'ensi?

Olw'enziramu y'ekibuuzo 14 a) eragiddwa mu lukangaga waggulu, tewali baawakanya nsonga ya kuba nti ebyobuwangwa ebisomesebwa ku ddaala lya sekendule birina engeri gye biyinza okukuuma obutonde bw'ensi bwe biba bissiddwa mu nkola. Noolwekyo ekibuuzo kino (14 c)) tewali baakyanukula.

4.2.4.8. Ekibuuzo 15 a) Waliwo ebintu by'omanyi bye wali okoze nga bisobola okuyamba mu kukuuma obutonde bw'ensi?

Ekibuuzo kino kyagendererwamu kuzuula oba nga waliwo ebintu abantu abaasoma ebyobuwangwa mu sekendule bye bakola mu bulamu bwabwe nga bisobola okuyamba mu kukuuma obutonde bw'ensi. Ekibuuzo kino kikwata butereevu ku nsonga y'okusimbuliza ebisomeseddwa ne byeyambisibwa mu bulamu mu nsi, ne tubissa mu nkola. Kiroopa obusobozi oba obutasobola bw'abayizi b'ebyobuwangwa okweyambisa ebyobuwangwa okukuuma obutonde bw'ensi. Enziramu y'ekibuuzo kino eragiddwa mu lukangaga luno wammanga.

Olukangaga (xii): Abantu abassa mu nkola ebyobuwangwa mu ngeri esobozesa okukuuma obutonde bw'ensi

Okuddamu	Omuwendo	Ku buli kikumi
Yee	49	81%
Nedda	11	19%
Omugatte	60	100%

Okunoonyereza kuno kwazuula nti abantu abasinga obungi, abawereza ddala ebitundu nsanvu-mu-bina ku kikumi (81%) abaayanukula ebibuuzo by'okunoonyereza kuno bakkiriza nti waliwo ebintu bye baali bakoze nga bisobola okuyamba mu kukuuma obutonde bw'ensi. Ate bo abatono, abaweza ebitundu abiri-mu-bisatu byokka ku kikumi (19%) ku baabuuzibwa, ne balaga nti bo tewali kintu kye baali bakoze nga kiyamba okukuuma obutonde bw'ensi.

4.2.4.9 Ekibuuzo 15 b) Bwe kiba yee, bimenye nga olaga n'engeri buli kimu gye kiyinza okuyamba okukuuma obutonde bw'ensi.

Ekibuuzo kino kyagendererwamu kuzuula bintu eby'enjawulo abantu abaasoma ebyobuwangwa mu sekendule bye bakola ng'engeri y'okukuuma obutonde bw'ensi. Ennyanukula y'ekibuuzo kino yavaamu eby'okuddamu ebiwererako era wammanga lwe lukangaga olulaga ekyo kye nnyini kye baakola ku ludda olwa kkono n'engeri gye kisobozesaamu okukuuma obutonde bw'ensi nga eragiddwa ku mukono ogwa ddyo okukyolekera.

Olukangaga (xiii): Ebintu ebyali bikoledwa abaaliko abayizi b'Oluganda nga bikuuma obutonde bw'ensi, n'engeri gye biyambamu okukuuma obutonde bw'ensi.

Ekikolwa	Engeri gye kiyambamu okukuuma obutonde bw'ensi.
➤ Okusimba emiti	▪ Kisiba omuyaga ogba gwandyerudde ettaka ▪ Kireeta enkuba ennungi ▪ Emiti giziyiza okukulugguka kw'ettaka ▪ Gizimbwamu ne gibudamya ebinyonyi ▪ Gikola ebisiikirize okuwummulira ensolo
➤ Okuzikiza omuliro gw'oliyiira	▪ Kiyamba okusigaza ebibira n'essubi ebikola enkuba ko n'okuba ebisulo by'ebinyonyi n'ensolo z'omu nsiko
➤ Okulima	▪ Kigonza ettakane linywanga bulungi amazzi n'omukka ebirikuuma nga ddamu era ngaggimu bulungi
➤ Okuzimba zikabuyonjo	▪ Kiremesa okusaasaana kw'obukyafu ko n'okugema ekivundu ku nsi.

➤ Okusimba ebimuli	▪ Bikola akaloosa akalungimu nsi ate nga bivaamu n'omukkagw'obulamu omulungi gwe tussah
➤ Okulunda enjuki	▪ Zino ziyambako mu kutambuza ensigo z'ebimera olwo nebyala.
➤ Okwokya obuveera	▪ Kibulemesa okuwagamira mu ttaka ne buziyiza ettaka okunywa amazzi n'omukka ebirifuula eddamu era eddungi okulimako.
➤ Okugogola emyala	▪ Kikuumaenkulukuta y'amazzi nga nnungi.
➤ Okulunda ebisolo n'ebinyonyi awaka	▪ Kibisobozesa okukuumibwa ne bikula, ne bizaala olwone byala ne birema kuggweerawo ddala.
➤ Okulima nga bwoyosaamu ebibanja	▪ Kiwa ettaka omukisa gw'okuddamu okutumbula obugimu bwalyo.
➤ Okusimba omuddo gwomu luggya	▪ Kiremesa okukulugguka kw'ettaga eggimu.
➤ Okuvubisa obutimba bw'ebynyanya obutuufu	▪ Kisobozesa ebyennyanya okukula n'okuzaala n'okwala ne bitaggweerawo ddala.
➤ Okussa obusa munnimiro	▪ Kitumbula obugimu bw'etaka
➤ Okugogola ensulo z'amazzi	▪ Kikuuma enkulukuta y'amazzi ennungi ey'obutonde. ▪ Kikuuma amazzi nga mayonjo.
➤ Okutambuza enjiri y'okukuuma obutonde bw'ensi mu bantu	▪ Kiyamba okusomesa abalala engeri y'okukuumamu obutonde bw'ensi n'okukibaagazisa.

Okunoonyereza kuno kwazuula enkola kkumi-na-taanu (15) ezikuuma obutonde bw'ensi azaali zikoleddwa abantu abaasoma eby'obuwangwa mu sekendule abeetaba obutereevu mu kunoonyereza kuno. Enkola ezo zirinaengeri makumi abiri (20) gye ziyambamu okukuuma obutond bw'ensi, nga kino kiraga nti ezimu ku nkola. zino ziyamba okukuuma obutonde bw'ensi mu ngeri ezisukka mw'emu.

4.2.4.10 Ekibuuzo 15 c) Bwe kiba nedda, lwaki walemererwa?

Abantu abaweza ebitundu ekkuminomwenda (19) abasoma ebyobuwangwa mu sekendule abetaba obutereevu mu kunoonyereza kuno baalaga nti tewali kintu kye baali bakoze nga kiyamba okukuuma obutonde bw'ensi. Ekibuuzo kino kyagendererwamu kuzuula nsonga ezibalemesa okubaako kye bakola nga kiyamba okukuuma obutonde bw'ensi. Enziramu yaakyo yeeyolekedde mu lukalala lwa sentensi zino wammanga ze baakijjuzaako.

- Obutaba na byeyambisibwa ebyandibasobozesezza okukuuma obutonde bw'ensi, gamba nga ebizikiza omuliro singa basanga oluyiira lwokeddwa.
- Okubulwa ebintu bye basikiza ebyo ebyonoona obutonde bw'ensi, gamba nga obutaba na biyinza kukola nga buveera nga byo tebyonoona butonde.
- Obungi bw'abantu obweyongera buli lukya obumalawo ekifo ekyandyeyambisiddwa okulimirako oba okulundirako.
- Obutaba na buyinza (ng'obwa gavumenti) okulagira okusaanyizibwawo kw'amakolero agafulumya ebikka ebibi eri obutonde bw'ensi.
- Obutamanya bintu ki byennyini ebiyinza okuyamba okukuuma obutonde bw'ensi, kubanga n'ebyobuwangwa ebyandiyambyeko byadibizibwa...

Okunoonyerezakuno kwazuula ensonga ttaanu (ezo waggulu) eziremesa abamu ku bantu abeetaba mu kunoonyereza kuno obutereevu okwenyigira mu nkola z'okukuuma obutonde bw'ensi.

ESSUULA EYOOKUTAANU

Okukubaganya ebirowoozo okuweera n'okufundikira

5.1 ENNYANJULA

Essuula eno y'erimu okukubaganya ebirowoozo, okuweera, n'okufundikira kw'ebyo byonna ebyazuulibwa mu kunoonyereza kuno. Erambikiddwaamu endowooza z'omunoonyereza nga zeesigamizidwa kw'ebyo ebyazuulibwa okuva mu nnyanukula y'abantu abaali babaddeko abayizi b'olulimi Oluganda abaasoma ebyobuwangwa ku ddaala lya sekendule abeetaba obutereevu mu kunoonyereza kuno. Mu ssuula eno, omunoonyereza akubaganya ebirowoozo kw'ebyo ebirambikiddwa mu ssuula eyookuna, n'aweerera amagezi eri abantu ab'ebiti eby'enjawulo, ate oluvannyuma n'afundikira alipoota y'okunoonyereza eno.

5.2.0 OKUKUBAGANYA EBIROWOOZO

Okukubaganya ebirowoozo kuno kwesigamye ku bigendererwa by'okunoonyereza kuno ebisatu kinnakimu omuli: okuzuula obukulu bw'obutonde bw'ensi mu kuyimirizaawo ebyobuwangwa; okuzuula engeri obutonde gye bweyoleseza mu masomo ga sekendule ag'ebyobuwangwa; ko n'eky'okuzuula omugaso gw'ebyobuwangwa eri okukuumibwa kw'obutonde bw'ensi.

5.2.1 OBUKULU BW'OBUTONDE BW'ENSI MU KUYIMIRIZAAWO EBYOB UWANGWA

Okunoonyereza kuno kwazuula nti obutonde bw'ensi bwe butuwa embeera esobozesa okutuukiriza ebyobuwangwa byaffe. Okugeza, embeera y'obudde bw'etaba nnungi, abantu baba tebakyayinza kutuukiriza byabuwabgwa byaffe. Ebyobuwangwa by'Abaganda ebimu gamba nga emirimu omuli okulima, okutta enswa, okubumba, okuvuba, n'emirala njolo tegisobola kubaawo awatali butonde. Kino kikkaanya butereevu n'ebirowoozo bya Pickering ne Owen (1994) abannyonnyola nti tewali mulimu gutambula awatali butonde bwa nsi. Kino nno kitegeeza nti obutondwe buteekwa buteekwa okuwanirirwa n'okukuumibwa bwe tuba tunaasigaza obuwangwa bwaffe. Ani alisobola okulima nga obugimu bw'ettaka buweddewo? Ani alisobola okuvuba nga ennyanja zikalidde? Oliyigga wa nga ensiko esaanyiziddwaawo? Ku butonde obuwangwa kwe busimbye.

Okunoonyereza kuno kwazuula nti obutonde bw'ensi bwe butuwa ebikozesebwa bye tweyambisa mu kutuukiriza ebyobuwangwa. Nga oggyeeko okuba nti obutonde bw'ensi butuwa embeera esobozesa okutuukiriza ebyobuwangwa byaffe, n'ebintu byennyini ebyeyambisibwa mu kukola obulombolombo bw'obuwangwa obw'enjawulo biva mu butonde. Okugeza, ebintu ebyeyambisibwa mu mirimu gy'Abaganda gamba nga okulima omuli enkumbi, ensoloby; ebyeyambisibwa mu mizannyo gy'Abaganda gamba nga ogw'okusiba kantuntunu, okukuba enkuyo, n'emizannyo emirala gyonna biggyibwa mu miti gamba ng'emiyini, ebirala ku bitooke gamba nga ebyayi n'ebisanja, oba okuva ku kintu ekilala kyonna eky'obutonde, era nga Kirwana (2007) bw'akinogaanya. Bye tuvubisa, bye tulimisa, bye tuzimbisa, bye twaluza abaana, bye tuyiggisa, bye tuziikamu abafu baffe, na buli kyonna ekyeyambisibwa mu kutuukiriza ebyobuwangwa by'Abaganda kiva mu butonde, noolwekyo kitukakatako okubukuuma obutiribiri.

Okunoonyereza kuno kwazuula nti obutonde bw'ensi bwe butusobozesa okuyigiriza ebyobuwangwa eri emiti emito. Nga bwe tumaze okulaba nti ebyobuwangwa bituukirizibwa kuyita mu kweyambisa embeera y'obutonde n'okukozesa ebintu by'obutonde, okunoonyereza kuno kwazuulayo n'ensonga y'okuba nti obutonde butuyamba nnyo mu kusomesa ko n'okutendeka ebyobuwangwa eri abaana baffe (emiti emito) era n'abantu abakulu ababa batabimanyi. Tetulina ngeri gye tuyinza kusomesa masomo ga byabuwangwa nga tetweyune bintu bya butonde ebitwetoolodde ng'enkwaso y'okunyonnyolerako ebyobuwangwa bye tusomesa. Okugeza, omuyizi okumanya obukulu n'omugaso gw'olubugo eri Omuganda tekimumala naye aba yeetaaga n'okulaba ku mutuba gwennyini olubugo mwe luva. Mu bufunze, ka tugambe nti okukakasa nti ebyobuwangwa by'abantu tebiisaanewo, tulina okweyambisa obutonde nga tubisomesa omujiji omuto ng'ate tubalaga n'engeri y'okweyambisaamu obutonde okusobola okuttuukirizaamu obuwangwa bwabwe.

Era okusinziira ku byazuulibwa mu kunoonyereza kuno, obutonde bw'ensi bwe bunyumisa ebyobuwangwa bwe biba bittuukirizibwa. Kino omulala ayinza okukinyooma naye tetusaanye kwerabira nti omuntu bw'aba tanyumirwa ky'akola kimusemba mangu era takituukiriza bulungi kubanga aba afa kutuukiriza luwalo. Okuyita mu kweyambisa obutonde bw'ensi, ebyobuwangwa bingi bisobola okufuulibwa ebinyuvu eri abo ababituukiriza. Okugeza, mu mizannyo gy'Abaganda, omuzannyo gw'ekigwo ekiganda guyinza obutagenda bukwakku nga gukoledwa mu kifo ekitalimu bususbi ate nga kijjudde obugulumbogulumbo. Kino kitegeeza nti abazannya omuzannyo guno tebagenda kugunyumirwa era bagenda kwanguyirwa okwettanira emizannyo gy'ekizungu okugeza egyoku kompyuta egiteetaaga kifo kigazi ebweru. Kino ne Kimala (1996) akinogaanya bw'agamba nti emirimu gy'Abaganda ginyuma nnyo bwe giba gizannyiddwa mungerient5uufuera mu kifo ekituufu. Ddala okunyumisa ebyobuwangwa obutonde bulina okweyambisibwa ko n'okukuumibwa.

5.2.2 ENGERI OBUTONDE GYE BWEYOLESEZA MU MASOMO G'EBYOBUWANGWA

Okusenziira kw'ebyo ebyazuulibwa mu kunoonyereza kuno, ebintu by'obutonde bino wammanga byeyoleseza nnyo mu masomo g'ebyobuwangwa by'Abaganda mu sekendule: ekitooke, emmere enqanda, omutuba, omuddo, emiti, ettaka ettale ebiswa, obutiko, emmwanyi ebimera, ebiswa, ebiwuka (Enswa), ebinyonyi, ebisubi n'ebirala. Okunoonyereza kuno kwazuula nti abantu bonna (100%) abaayanukula ebibuuzo by'okunoonyereza kuno bakkiriza nti ebintu by'obutonde bino byabayambanga ng'abayizi okutegeera ebyobuwangwa bye baasomanga. Zino wammanga ze ngeri enkulu ebyobutonde bino ze byeyolekeramu mu masomo g'ebyobuwangwa.

Ebyobutonde ebiri ku sirabaasi y'Oluganda mu kiwayi ky'olulimi ekyebuwangwa. Bino byeyoleka ng'ebuwangwa olw'engeri obuwangwa gye bubikwatamu oba okubissaamu ekitiibwa. Kino kiri ku byobuwangwa nga: Omuganda n'ekitooke, omuganda n'ensiko, emmere enqanda, n'ebirala. Kino kitegeeza nti kyenkana mu mbeera nga zino, butonde bwennyini bwe buba busomesebwa eri abayizi nga bamanyisibwa engeri gye bukwatibwamu Abaganda. Kino kikkaanya bulungi n'ekyo Kirwana (2006) ky'agamba bw'annyonnyola nti emmere enqanda nkulu nnyo wano mu Buganda essibwamu ekitiibwa eky'enjawulo okuva ku mmere endala yonna.

Enkola n'ebintu ebyeyambisibwa mu kusomesa. Okunoonyereza kuno era kwazuula nti obutonde bw'eyambisibwa mu kibiina mu masomo g'ebuwangwa okuyita mu bintu ebyeyambisibwa mu kusomesa, okugeza ennoni eziwandiisibwa, olubaawo okuwandiikwa, n'ebyo ebyeyambisibwa mu kuluddugaza obulungi (okulumaala), n'ebintu ebikalu ebireetebwa mu kibiina ng'ebyokulabirako mu kunnyonnyola abayizi eky'obuwangwa ekisomesebwa, okugeza, omusomesesa bw'aba asomesa ku ky'obuwangwa ky'okukomaga, talema kweyambisa bintu nga ekitentegere, ensaamu, oba n'okulaga abayizi omuti gw'omutuba (bwe gubaawo awo ku ssomero), oba okubalaga ebifaanayi byabyo oba ebimu ku byo. Kino era kisinziira ne kun kola omusomesa gy'aba yeeyambisiddwa, okugeza, ayinza

okusalawo okutwalako abayizi ebweru w'ekibiina okugeza n'abatwala mu ttale nga abadde abasomesa ku ky'obuwangwa ky'O muganda n'ensiko.

5.2.3 OMUGASO GW'EBYOBUWANGWA ERI OKUKUUMIBWA KW'OBUTONDE BW'ENSI

Okunoonyereza kuno kwakizuula nti ebyobuwangwa byolesa bulungi omugaso gw'obutonde bw'ensi. Nga bwe kyogeddwaako waggulu obutonde n'obuwangwa tebitanqana. Omuntu alaba omugaso mu byobuwangwa era aba alaba omugaso mu butonde, kubanga ebyobuwangwa byetaaga eby'obutonde okusobola okutuukirizibwa. Kino kituukana bulungi n'ekyo Kirwana (2007) ky'agamba nti ebyobuwangwa biyamba nnyo okukuuma obutonde bw'ensi, era nga we bitali nabwo bukosebwa.

Okunoonyereza kuno kwakizuula nti ebyobuwangwa ebisinga byo byennyini bikuuma obutonde bw'ensi. Ebyobuwangwa by'Abaganda okugeza eky'okuziika abafu, okulunda ebisolo n'ebinyonyi awaka, n'enkola endala ezitumbula obutonde bw'ensi. Esonga eno ekakasa nti ebyobuwangwa bya mugaso nnyo mu kukuumibwa kw'obutonde bw'ensi. Kino kikakasibwa ebyo Witheric (1995); Sarre ne Blunden (1996) bye baagamba nti ebyobuwangwa nga bigoboroddwa n'obwegendereza bisobola bulungi okuyamba okukuuma obutonde nga butebenkedde.

Okunoonyereza kuno kwakizuula nti ebyobuwangwa bye bikunga obulungi abantu. Abantu mu butonde bwabwe babaamu obwagazi eri eggwanga lyabwe n'ebuwangwa byabwe. Noolwekyo enkola y'okutumbula ebyobuwangwa ng'enkwaso y'okukuuma obutonde bw'ensi eba nsaale mu kutuukiriza kino kubanga buli ayagala ebyobuwangwa aba ajja kwetaba butereevu mu kaweefube ono. Ebyobuwangwa bisangiddwa biriko ababimanyi bangi, ate nga tebisosola mu bantu nga

noolwekyo bwe byeyambisibwa okutumbula obutonde bw'ensi buli muntu oba mukulu oba muto, eyasoma n'ataasoma baba ba kwenyigira mu mugendo guno. Briggs ne Courtney (1989) ensonga 3eno bagikkaatiriza bwe bagamba nti abantu banguyirwa nnyo okwwetaba mu nkola ezibagattira awamu ng'ezoobuwangwa bwabwe.

Okunoonyereza kuno kwakizuula nti ebyobuwangwa si byangu bya kukoma, noolwekyo bisobozesa okuwangaala kwa kaweeefube w'okukuuma obutonde bw'ensi. Okunoonyereza kuno kwazuula nti kaweeefube w'okukuuma obutonde bw'ensi alina okuteekebwa mu nkola bulijjo ne bulijjo awatali kukoma. Kino kitegeeza nti enkola z'okutuukiriza kino nazo zirina kuba nga si za kuggwa nkya. Wano ebyobuwangwa we bibeerera eby'enkizo kubanga nabyo si bya kukoma. Kino Heineman (1984) akinnyonnyola bulungi bw'atutegeeza nti weetaagisaawo enkola empangaazi ez'okutumbula obutonde bw'ensi nga n'emirembe egiriddawo gisobola okusikira enkola ezo. Noolwekyo, bwe tweyambisa ebyobuwangwa okutumbula obutonde bw'ensi, kaweeefube oyo tagenda kulemesebwa, n'emirembe egiriddawo gijja kumweyambisa, olwo obutonde bw'ensi bukuumibwe ddala.

Okusenziira ku byazuulibwa mu kunoonyereza kuno, ebyobuwangwa bingi bisangiddwa nga kitundu ku bulamu bw'abantu obwabulijjo, era nga eno y'emu ku nsonga eyaweebwa abantu abeetaba mu kunoonyereza kuno nga eyabasobozesanga okwanguyirwa amasomo g'ebyobuwangwa mu sekendule. Witheric (1995) ensonga eno agiwagira bw'agamba nti abantu bwe basomesebwa ekintu ekisangiddwa nga kiri mu bulamu bwabwe obwa bulijjo, tebakoma ku kukitegeera mangu, naye era banguyirwa okukifaako n'okutamdika okukissa mu nkola. Noolwekyo eby'obuwangwa bwe biba byeyambisiddwa ng'enkwaso y'okunnyikiza kaweeefube w'okukuuma obutonde bw'ensi biba tebikosa nteekateeka za bantu era byangu bya kweyuna ng'omukutu gw'okutumbuliramu obutonde bw'ensi awatali kutaataaganya bulamu bw'abantu obwabulijjo. Mu ngeri y'emu, abantu banguyirwa okussa mu nkola kaweeefube ono mu buli kanyomero ka bulamu bw'abantu.

5.3 OKUWEERERA

Okusenziira ku byazuulibwa mu kunoonyereza kuno, waliwo empenda ezisaana okussibwako omulaka ebibinja by'abantu ab'enjawulo mu nsi naddala wano mu Uganda okusobola okubunya obulungi era n'okuganyulwa mu kaweeefube w'okukuuma obutonde bw'ensi.

5.3.1 Gavumenti n'ebitongole bya nnakyewa

Okusenziira ku kunoonyereza kuno, gavumenti n'ebitongole bya nnakyewa ebyomu ggwanga lino era n'eby'ensi yonna, bwe baba bategeka emisomo egikolebwa okusomesa era n'okwagazisa abantu ebikwata ku kukuuma obutonde bw'ensi, ebyobuwanga by'abantu tebirina kubuusibwa maaso mu nteekateeka zino kubanga, bireetera abantu okwenyigira mu kaweeefube w'okukuuma obutonde bw'ensi n'omutima omwagazi, ate nga n'ebimu ku byo byennyini bwe bissibwa mu nkola n'obwegendereza bisaale nnyo mu kuwagira enkola z'okukuuma obutonde bw'ensi.

Ate mu ngeri endala, ebyobuwangwa bisobola n'okweyambisibwa ng'olujegere lw'okuyunga abantu abagwa mu biti eby'enjawulo: abakulu n'abato, abaasoma n'abataasoma, aboomubyalo n'aboomubibuga, n'ab'ebiti ebiralala byonna, kubanga bonna batambuliza obulamu bwabwe mu byobuwangwa. Noolwekyo bisaale nnyo mu kubakunga okwenyigira obutereevu mu kaweeefube ono ow'okutaakiriza, okutumbula n'okukuuma obutonde bw'ensi.

Ensonga enkulu ezirina okussibwako essira mu misomo gy'okubunya enjiri y'okutumbula obutonde bw'ensi mulimu ey'okugonza n'okumenyaamenya enkola ezisobola okukolebwa okutumbula obutonde bw'ensi nga balaga abantu nti ku buli ddaala omuntu kw'ali aba asobolera ddala okwetaba obutereevu mu kaweeefube w'okukuuma obutondebw'ensi, kubanga abantu bangi balowooza nti ddimu ddene eritasobokerako ddala kukolebwa baavu era nga n'omuntu omu talina ky'ayinza kukola

kya mugaso. Kino kyeyolekera mu nsonga ezaaweebwa abo abaalaga nti tebafunanga busobozi bwa kwenyigira mu kukuuma obutonde bw'ensi.

Ekyokulabirako, abantu abamu abaayanukula ebibuuzo by'okunoonyereza kuno bannyonnyola nti okukuuma obutonde bw'ensi kwabalemerera lwa butaba na byeyambisibwa ebyandibasobozesezza okukuuma obutonde bw'ensi, gamba nga ebizikiza omuliro singa basanga oluyiira lwokebwa; abalala nti lwa kubulwa ebintu bye basikiza ebyo ebyonoona obutonde bw'ensi, gamba nga obutaba na biyinja kukola nga buveera nga byo tebyonoona butonde; abalala nti lwa butaba na kifo kigazi kiyinza kweyambisibwa okulimirako oba okulundirako; ate abandi nti lwa butaba na buyinza (ng'obwa gavumenti) okulagira okusaanyizibwawo kw'amakolero agafulumya ebikka ebibi eri obutonde bw'ensi. Endowooza ng'ezo ze zireetera abantu okwesuilirayo ogwa Naggamba ku nsonga eno eyookukuuma obutonde bw'ensi, anti balowooza nto bo tebalina busobozi, so nga ddala babulina obuwera, bwetaaga bwetaazi kubalagibwa na kubannyonnyolwa.

Ekirala, abantu basuubira nti beetaaga kusooka kusomerera bya butonde okusobola okwetaba mu kukuuma obutonde bw'ensi mu ngeri entuufu, ennungi, era etamenya mateeka. Ebyembi bwe gutuuka ku kuttattana tebamala kulinda batendekebweokuttattana obutonde bw'ensi. Wabula ate oludda olulala bandiba abatuufu, kubanga waliwo enkola ezaasooka okuyigirizibwa abakugu b'ebyobutonde bw'ensi nti nnungi mu kukuuma obutondebw'ensing'ateoluvannyumazaazuulibwanga zabulabe eri obutonde bwe bumu.

Ekyokulabirako ku nsonga eno kyeky'okwokya obuveera. Era mu butuufu abantu bangi bakyalowooza nti bwe bookya obuveera baba babutangidde okuduza ettaka kyokka nga tebamanyi nti baba batumbula obulabe ate obusinga ku kududa kw'ettak – obw'agakka agabi agambuka eyo waggulu ate ne gaddira mu nkuba ey'obutwa ebutaabutanya ebirime, ate naffe ne tugiembekako ne tunywa. Mu byayanukulwa mu bibuuzo by'okunoonyereza kuno, abantu amakumi abiri kw'abo

abaalaga nti bo beenyigirako mu nkola z'okukuuma obutonde bw'ensi babalirako n'enkola y'okwokya obuveera, era baagiwandiika butereevu ku mpapula z'okunoonyereza kuno.

Noolwekyo, abalinda okusomesebwa bandiba abatuufu. Gavumenti n'ebitongole ebirala ebitakabanira okukuumibwa kw'obutonde bw'ensi basaana okukolagana n'abakugu b'obutonde olwo emisomo gikwajje, abantu aba bulijjo bamanye enkola zennyini entuufu ze balina okweyambisa okusobola okukuuma obutonde bw'ensi.

5.3.2 Abakulu b'ebyenjigiriza

Okunoonyereza kuno kwazuula era kwelambika bulungi amaanyi g'ebyobuwangwa ebisomesebwa abayizi mu kusalawo engeri gye beeyisaamu eri obutonde bw'ensi nga bakyali mu ssomero era n'oluvannyuma lw'okumalako emisomo gyabwe. Noolwekyo, abakulu b'ebyenjigiriza naddala abomu nsi yaffe Uganda basaana okufaayo ennyo okutumbula amasomo agasomesebwa mu byenjigiriza era n'okulondamu ago agatumbula eby'obutonde bw'ensi (okugeza ery'ebyobuwangwa by'Abaganda) gawagirwe era n'omutindo gw'amasomo ago gutumbulwe. Kino kisobola okukolebwa. Okunoonyereza kuno kwanjuluza bulungi obukulu bw'ebisomesebwa bye balonda okubeera mu sirabaasi y'essomo ly'olimi Oluganda era n'ez'amasomo amalala gonna ag'enjawulo era nga kulaga obwetaavu bw'okufa ennyo ku masomo agakwata obutereevu ku butonde bw'ensi; nti era mu kutumbula omutindo gwa kaliculaamu obutonde bw'ensi bulina okussibwamu ekitiibwa eky'enjawulo ensangi zino.

Okufaayo kw'abakulu b'ebyenjigiriza mu kutumbula obutonde bw'ensi tekulina kukoma mu kubaga zisirabaasi kwokka wabula ne mu kuweereza eri amasomero ebintu eby'okweyambisa ebituufu era ebimala, okusobozesa amasomo agakwata ku butonde bw'ensi okugenda obukwakku. Era ne mu matendekero g'abasomesa, ensonga y'okukuuma obutonde bw'ensi erina okusigibwa mu mitima

gy'abasomesa olwo nabo lwe banaasobola okugisiga mu bayizi baabwe. Ensonga y'okukuuma obutonde bw'ensi terina kukoma awo wabula ne bwe kituuka ku kulambika enkola z'okugezesa n'okulamula abayizi abasomesa ze balina okugoberera, okwo ssaako mu kutegeka ebibuuzo by'okumaliriza omutendera ogumu mu byenjigiriza ebitegekebwa ekitongole kya UNEB, ebintu ebigezesa engeri abayizi gye baategeeramu ensonga zino ezikwata ku butonde bw'ensi. Kino kijja kuyamba abasomesa okuzuulanga wa we beetaaga okunogaanya ku nsonga z'obutonde bw'ensi, ate n'abayizi baba tebajja kwesuulirayo gwa nnaggamba nga ebintu ebikwatagana n'obutonde bw'ensi bisomesebwa kubanga baba bamanyi nti bijja kubabuuzibwa mu bigezo, naddala eby'akamalirizo.

5.3.3 Abasomesa

Nate okusenziira ku byazuulibwa mu kunoonyereza kuno, abasomesa b'ebyobuwangwa (era n'abasomesa ab'amasomo amalala) basaanye okufa ennyo ku nsomesa yaabwe gye basomesezaamu amasomo ge basomesa. Okugeza, beetaaga okufangayo ennyo ku nnonda y'enkola ezeeyambisibwa mu kibiina. Basaana okweyambisanga enkola ey'okutobeka nga bafuba okuggyayo ekigendererwa ky'okutendeka abayizi okubasobozesa okukuuma obutonde bw'ensi. Ebintu ebisomesebwa mu masomero biteekeddwa okukwataganyizibwa obutereevu n'ensonga eno ey'obutonde, so si kuleka bayizi nti bo beezuulire bwezuulizi era bakwataganye bye basoma n'ensonga y'okukuuma obutonde bw'ensi.

Okusenziira ku nnyanukula y'abo abeetaba obutereevu mu kunoonyereza kuno, abayizi b'ebyobuwangwa mu sekendule bayiga bulungi ebyobuwangwa era bamanyi ne kyebiri. Wabula vbwe gutuuka ku kumanya obutonde bw'ensi, bangi abasigalamu empulunguse nga tebategedde ki obutonde bw'ensi kye buli. Wadde nga bayinza okuwaawaanya mu kutaputa obutonde bw'ensi kye butegeeza, naye abamu balemererwa okuzuulira ddala ebintu by'obutonde so nga bibeetoolodde. Okugeza, abasinga bamanyi migga, ensozi n'ebibira byokka, era abasinga bye baaleeta mu

kwanukula ekibuuzo nnamba taanu (5) mu lukalala lw'ebyababuuzibwa; batono abaamanya nti ebintu nga ettaka, ebinyonyi, ebiwukan'ebiralanabyo butonde bwa nsi. Kino nno kiraga obwetaavu bw'abasomesa okukoonanga ku mannya g'ebintu ebyo nga balaga abayizi nti bya butonde ate nti tubyetaaga, bya mugaso nnyo gye tuli. Mu ngeri y'emu, ebitnu ng'ebyo ebyobutonde bwe biba byeyambisibwa mu kibiina, omusomesa asana akkaatirize engeri omuntu gy'asobola okubitaakiriza bireme kusaanirawo ddala.

Abasomesaera bakyalina omulimu gw'okutendeka abayizi okukuuma obutonde bw'ensi nga batandikira ku kunnyonnyola abayizi kye kitegeeza okukuuma obutonde bw'ensi, obwetaavu bwakyo naddala mu nsangi zino, ate n'engeri eby'obutonde eby'enjawulo gye bisobola okukuumibwa. Abantu bangi, okusinziira ku kunoonyereza kuno, bamanyiiyo enkola za munyoto ddala ezisobola okweyambisibwa okukuuma obutonde bw'ensi ate nga zitwalibwa nga ez'ebbeeyi eya waggulu era ezitasoboka oba ezisobolwa gavumenti ko n'ebitongole ebigagga. Abantu ab'ekika ng'ekyo tebakoma awo naye n'enjiri y'okukuuma obutonde bw'ensi bagirekera era abo abalina obusobozi okugibunya. Nze ndowooza nti mulimu gwa basomesa mu masomero naddala abo abasomesa ebyobuwangwa mu sekendule okugonza n'okumenyaamenya ensonga y'enkola ezisobola okutumbula obutonde bw'ensi nga balaga abayizi baabwe nti ku buli ddaala omuntu kw'ali aba asobolera ddala okwetaba obutereevu mu kaweeefube w'okukuuma obutondebw'ensi.

Okusinziira kw'ebyo ebyazuulirwa mu kunoonyereza kuno, waliwo obwetaavu bw'abasomesa okulondanga ebyeyambisibwa mu kusomesa, nga bafuba okulaba nti tebikoma ku kuyisa buyisa bayizi bigezo wabula n'okubasobozesa okufuna obukugu n'obwagazi bw'okukuuma obutonde bw'ensi nga bakyali ku masomero gaabwe era n'awalala wonna we balaga ka babe nga bamalirizza emisomo gyabwe, era n'ebintu ebyeyambisibwa mu kusomesa, okwo ssaako embeera y'ekibiina n'essomero lyonna okutwalira awamu omusomesezebwa. Enkola eno esobola okusiga mu mitima

gy'abayizi ensigo y'okufaayo eri ensi kwe bali ko n'okukuuma obutonde bw'ensi. Kiba kya makulu omusomesa bw'abaako kye yeeyambisa mu kusomesa nga kiva mu butonde bw'ensi (era ebisinga mwe biva) n'akoona ku ky'okuba nti kiva mu butonde bw'ensi olwo nasiga mu bayizi obusiimi eri ebintu byonna lugaba bye yatuwa n'ebyo ebilabika ng'ebitalina mugaso eri bayizi (naddala abaana abato).

N'ebyobuwangwa byennyini ebimu awamu n'ensomesa yaabyo bisaana kukyuka. Ebyobuwangwa ebimu kati birina kusomesebwa busomesebwa nga byafaayo kubanga tebikyayinza kutuukirizibwa mu nsangi zino. Okugeza, omulimu gw'okuyigga guzze gukyuka era nga kati we kituuse tekikyasoboka kugukola ng'edda ne gutakosa butonde bwa nsi. Noolwekyo ebyobuwangwa ebiri mu ttuluba eryo bwe biba bisomesebwa, abasomesa bateekwa okulaga abyizi engeri enkyukakyuka mu nsi gye zibikosessa era n'engeri byo byennyini gye bikosaamu obutonde era nga kati tebukyasaana kussibwa mu nkola nga bwe gwali edda. N'ebimu ku byo mu kiseera kino bimenya mateeka ga ggwanga bwe bikolebwa nga bwe byakolebwanga edda, noolwekyo abasomesa balina okukinogaanya eri abayizi baleme kubikola mu ngeri ate eyonoona oba emenya amateeka.

5.3.4 Omugigi omuto

Abayizi b'ebyobuwangwa (n'ab'amasomo amalala gonna) ku madaala g'ebyenjigiriza ag'enjawulo nabo ba kuganyulwa nnyo mu byava mu kunoonyereza kuno singa banaayiga okukwataganyanga ebibasomesebwa n'ensonga eno ey'okukuuma obutonde bw'ensi; kwe kugamba nti balina okufangayo okuzuulanga obukwatane wakati w'ebyobuwangwa (awamu n'ebintu ebirala) ebibasomesebwa mu ssomero n'embeera z'obutonde bw'ensi. Okunoonyereza kuno kubalambululira bulungi obuvunaanyizibwa bwabwe mu nsi nga bibalaga nti ensi b'etunuulidde okulaba nga beenyigira butereevu mu nkola z'okukuuma obutonde bw'ensi nga beeyambisa amagezi, okumanya era n'endowooza ennungi ze bafunira mu masomo g'olulimi Oluganda ag'ebyobuwangwa. Era kya

magezi abayizi okweyongerayo n'emisomo gyabwe nga bakuguka mu nsonga z'okukuuma obutonde bw'ensi.

5.3.5. Abantu fenna awamu

Nziramu okukikkaatiriza nti alipoota y'okunoonyereza en one byonna ebigirimu bikwata ku buli muntu yenna afaayo eri ensi kw'ali kw'agenda okuleka enqanda, abaana n'abazzukulu. Ekintu kyonna kye tulaba nga kiyinza okukosa obutonde bw'ensi tusaana tukyewale. Ekintu kyonna ekisobola okutumbula obutonde bw'ensi tukikole (oba tukikozese). Abantu bonna be tulinako obukulu, enkizo oba obuvunaanyizibwa tubayingize butereevu mu kaweefube ono ow'okukuuma obutonde bw'ensi nga tuyita mu kubasomesa n'okubawaliriza n'okubasikiriza okumwetabamu, kino tukikole nga tetumaze kwebuuzza ku muntu yenna.

Mu bibinja ne mu bwannamunigina tufubenga okusigalaku nkola ezikuuma obutonde bw'ensi nga tujjukira nti ebibamba ebiva mu kutyoboolwa kw'obutonde bw'ensi bwe bitukuba, tebitaliza beekutte mu bibinja wadde abali mubwannamunigina. Buli bantu, bintu oba enkola edibaga obutonde bw'ensi tubiroopenga mu b'obuyinza awatali kutta ku liiso. Buli mulimu (project) ogulabika nga gutumbula obutonde bw'ensi tuguwagire, tugumanyise, tugubunyise. Bwe twenyigiramu awamu fenna, bibamba nnamuzisa omuli musisi, omuyaga, amataba, ekyeya, enjala, omuliro, endwadde, n'ebirala njolo ebizze bitutigomya tunaasobola okubikendeeza ennyo era tujja kutandika okweyagalira mu nsi eteriimu galwadde ganji wadde ebibamba nnamuzaaya.

5.4 EBYETAAGA OKUNOONYEREZE BWAKO

Mu kukola omulimu guno ogw'okunoonyereza ku mutwe guno, omunoonyereza yazuula ensonga zino wammanga ezeekuusa ku kunoonyereza kuno nga zirabika tezinnakolebwako kunoonyereza kumala okusobola okuzinogaanya obulungi. Abanoonyereza abajja munaaba mukoze bulungi okukola okunoonyereza okugazigazi ku mitwe gino:

- Obukulu bw'emikutu gy'ebyempuliziganya mu kutumbula obutonde bw'ensi.
- Omugaso gw'ebyobuwangwa mu kukendeeza obulabe bwa tekinologiya eri obutonde bw'ensi.

5.5 OKUFUNDIKIRA

Tuve ku bya 'Lugaba bwe yagera' nga tujjukidde ennyumba ezaagwa olw'okukubibwa kibuyaga ow'amaanyi, oboolyawo singa zaali zeebulunguddwa emiti egitegeerekeka, omuyaga gwandikwatiddwa emiti egyo ne gutazinduukiriza nju ezo mpaka ku ddimwa abantu baffe okuzaawa. Ye singa twabasimbira emiti mu luggya okusinga okutwala ez'amabugo; Smith ne Potley (2009) bakkaatiriza enjombi egamba nti okugema kusinga okuvumula. Ka tweyambise bye tulina okutaakiriza ebyo ebibadde bimaze okutuva mu ngalo: ebyobuwangwa tubeeyambisa mu ngeri esobozesa okukuuma obutonde bw'ensi, era tubisomese abalala mu ngeri ebasobozesa okukuuma obutonde bw'ensi.

Omulimu gw'okunoonyereza guno ku mutwe: "Engeri okusoma ebyobuwangwa ku ddaala lya sekendule gye kusobozesaamu abayizi okukuuma obutonde bw'ensi" gwaluubirira kulaba engeri gye tuyinza okweyambisa ebyobuwangwa ebisomesebwa mu sekendule okusobola okukuuma obutonde bw'ensi. Gwaggwa bulungi awatali kutaataaganyizibwa kwonna era ebyazuulibwa mu kwo byesigika bulungi. Noolwekyo, amagezi agasabikiddwa mu alipoota y'okunoonyereza eno gasaana

okusomebwa n'okutegeerebwa obulungi ate era gassibwe mu nkola kisobozese kaweefube w'okutumbula n'okukuuma obutonde bw'ensi okugenda mumaaso mu ngeri eyanguyireka abantu ate nga nsaale mu kutuukiriza ebkyo kyennyini ekyetaagibwa.

Mu bufunze, enkyukakyuka za mirundi ebiri ze zisuubirwa singa ebyazuulibwa era ebirambikiddwa mu alipoota eno bissibwa mu nkola:

Ekisookera ddala, ebisomesebwa mu masomero n'ebweru w'amasomero (naddala mu misomo egikwata ku kukuuma obutonde bw'ensi) n'engeri gye bisomesebwamu bya kukwanaganyizibwa butereevu ku nsonga y'okukuuma obutonde bw'ensi olwo abayizi batuuke okumala emisomo gyabwe nga bakuguse era nga bafunye obwagazi obw'enjawulo obw'okukuuma obutonde bw'ensi.

Ekyokubiri, ebyobuwangwa by'abantu bya kweyambisibwanga okusobola okutambulira mu bulamu obussaamu ekitiibwa obutonde bw'ensi era nga nabyo byennyini bya kugobererwa n'ekigendererwa ky'okutumbula n'okukuuma obutonde bw'ensi.

Okukuuma obutonde bw'ensi bwe busika bwe tukyasigazizza okulekera abaffe nga ffe tweyongeddeyo eyo etegenda badda. **Kulwa Katonda n'ensi yange.**

Ebitabo ebijuliddwa

Biswas, K., Asit and QU Geping (1987) Environmental Impact Assessment for developing countries.

Tycooly Publishing: London, U. K.

Briggs, D. and Courtney, F. (1989) Agriculture and Environment: The physical Geography of

Temperate Agricultural systems. Longman Publishers (Pte) Ltd, U.K.

Byrant, E., A., (1991) Natural Hazards. Cambridge: Cambridge University Press.

Corbett, J. McDonald (1995) Epidemiology of work related diseases. BMJ Publishing Group;

London.

Covello, V. T. and Mumpower, J. (1985) Risk analysis and risk management: an historical

perspective. Risk Analysis 5:103-20.

Davies, F. Geoffrey (1999) Dynamic Earth: Plates, Plumes and Mantle Convection. Cambridge

University Press; U.K.

Franklin, S., Lury, C. and Stacey, J. (2000) Global nature, global culture. SAGE Publications Ltd:

London.

Heinemann Core Science (1984) Environments: Book 4. Heinemann Educational Books Ltd, Oxford.

Kevin, T., Pickering and Owen, A. L. (1994) An introduction to global environmental issues.

Routledge: New York.

Kimala, A. (1996) Abaganda ab'edda.

Kirwana, S. (2007) Ebyobuwangwa ye mmunyeenye y'eggwanga.

Sarre, P. and Branden, J. (1996) Environment, Population and Development. 2nd edn Hodder, U.K.

Smith, K. and Potley, N. David (2009) Environmental hazards. Assessing risk and reducing disaster. 5th Edition, MPG Books Ltd, Great Britain.

Wisner, B., Blaikie, P., Cannon, T. and Devis, I. (2004) At Risk; Natural Hazards, People's vulnerability and disasters. London and New York: Routledge.

Witheric, M. (1995) Environment and people. Stanley Thornes (Publishers) Ltd, England.

AKAWAAYIRO

EBIBUZO BY'OKUDDIBWAMU ABAYIZI

Ebibuuzo bino bya kuddibwamu abantu abaali babaddeko abayizi b'olulimi Oluganda abaasoma ebyobuwangwa ku ddaala lya sekendule. Bigendereddwaamu kuzuula ngeri okusoma ebyobuwangwa ku ddaala lino gye kusobozesaamu abayizi okukuuma obutonde bw'ensi. Ssebo/Nnyabo, osabiddwa n'obuwombeefu okuddamu ebibuuzo bino byonna olw'obulungi bw'onulimo guno. Erinnya lyo toliwandiika ku lupapula luno kubanga ebulujuzibwako birina kusigala nga bya kyama, okuggyako laga erinnya ly'essomero gye wasomera olulimi Oluganda ku ddaala lya sekendule

1. Eddaala lya sekendule walimaliriza mu mwaka ki?

2a) Okola oba okyasoma?

Nkola ☐

Nkyasoma ☐

Nsoma nga bwe nkola ☐

Sisoma ate era sikola ☐

b) Bw'oba okola, okola mulimu gwa kika ki mu kiseera kino?.....

Londa mu gino oba ekilala kyonna: busomesa, busawo, neekolera gyange, nkolera kitongole, sikola era sisoma; oba ekilala kyonna kirage mu bufunze.

c) Bw'oba osoma, osomerera mulimu ki?

3) Essomo ly'ebyobuwangwa wakoma kulisoma nga oli mu kibiina ki?

4) Ekigambo "obutonde bw'ensi" okitegeera otya?

.....

.....

.....

5) Menyaayo ebintu by'obutonde by'omanyi.

.....

.....

.....

6) Nkola ki z'omanyi ezoonoona obutonde bw'ensi?

.....

.....

.....

.....

7) Kabi ki akayinza okuva mu kwonooneka kw'obutonde bw'ensi?

.....

.....

.....

.....

8 a) Waliwo ebyobuwangwa bye mwasomanga nga okubissa mu nkola kwesigama ku butonde

bw'ensi? ☐

☐ Nedda

Yee

b) Bwe kiba yee, menyaayo by'ojjukira.

.....

.....

.....

c) Bwe kiba nedda, olowooza waliwo kye wasubwa? Nnyonnyola.

.....

.....

.....

.....

9) Ekigambo ebyobuwangwa okitegeera otya?

.....

.....

.....

.....

10) Menyaayo ebyobuwangwa by'ojjukira bye wasomera mu sekendule.

.....

.....

.....

11 a) Waliwo ebintu by'obutonde by'ojjukira nga byabayambanga mmwe ng'abayizi okutegeera ebyobuwangwa bye mwasomanga?

Yee ☐

Nedda ☐

c) Bwe kiba yee, bimenye nga ku buli kimu olaga ekyobuwangwa kwe kyabayambira.

I.

.....

II.

III.

IV. c) Bwe kiba nedda, bintu ki ebyabayambanga okutegeera ebyobuwangwa?

.....

12) Okukuuma obutonde bw'ensi kitegeeza ki?

.....

13 a) Olowooza waliwo obwetaavu bw'okukuuma obutonde bw'ensi mu nsangi zino?

Yee ☐

Nedda ☐

b) Bwe kiba yee, lwaki?

.....

c) Bwe kiba nedda, lwaki?

.....

.....

.....

14 a) Waliwo ebyobuwangwa bye mwasoma nga birina engeri gye bikuumamu obutonde bw'ensi singa biba bissiddwa mu nkola?

Yee ☐

Nedda ☐

b) Bwe kiba yee, bimenye nga olaga n'engeri buli kimu gye kiyinza okuyamba okukuuma obutonde bw'ensi.

Ekyobuwangwa	Engeri gye kiyambamu okukuuma obutonde bw'ensi.
1.	
2.	
3.	

c) Bwe kiba nedda, olowooza tuyinza tutya okweyambisa ebyobuwangwa okusobola okukuuma obutonde bw'ensi?

.....

.....

.....

.....

15 a) Waliwo ebintu by'omanyi bye wali okoze nga bisobola okuyamba mu kukuuma obutonde bw'ensi?

Yee ☐

Nedda ☐

b) Bwe kiba yee, bimenye nga olaga n'engeri buli kimu gye kiyinza okuyamba okukuuma obutonde bw'ensi.

I.

II.

c) Bwe kiba nedda, lwaki walemererwa?

.....

Weebale nnyo, weebalege.